

Naqqiut

Siunnersuut 13. Marts 2017-imeersoq taarsissavaa

Tunngavilersuut: Naqqiutip imaraa inatsisip oqaasertaani naqqiisoqarnerata kinguneranik oqaasertani assigani aaqiineq.

Inatsisissatut siunnersuummut nassuiaatit

Oqaaseqaatit nalinginnaasut

1. Aallaqqaasiut

Inatsisissatut siunnersuut aningaasarsianit akileraarutit pillugit inatsisip ingerlaavartumik naleqqussarlugulu nutarterneqarnerata ilagaa, pingaartumik inuussutissarsiutinik akileraarusiisarneq aamma maleruagassaareersunik unioqqutitsiniartoqarnissaa pinngitsoortinniarlugu maleruagassat eqqarsaatigalugit.

Nunarsuarmi tamarmi akileraarutitigut iluanaarniarneq nunanit tamanit sammineqartorujussuuvoq. Tamannalu ilaatigut OECD-p nunallu G20-mut ilaasut BEPS (Base Erosion and Profit Shifting - Akileraarnikinnerunissamik akileraanginnissamilluunniit siunertaqarluni akileraarusigassanik ilanngarterisarneq nunanulluunniit allanut nuussisarneq) akiorniarlugu suliniutaatigut pivoq. BEPS tassaavoq assigiinngitsunik periuseqarluni, nunani qaffasissunik akileraaruteqarfiusuni sinneqartoorutinik nunanut appasissunik akileraaruteqarfiusunut akileraaruteqarfiumngitsunulluunniit nuussisarneq, tassa nunat akileraartarnikkut inatsisaanni ”putunik” assigiinngissutsinillu atonerluinikkut. BEPS akiorniarlugu suliniutip nassatarisaanik iliuusissatut pilersaarut iliuusissanik assigiinngitsunik arlaqartunik imaqartoq suliarineqarpoq, ilaatigut aamma akileraarutitigut ingasaassilluni iluanaarniuteqartarnerit akiorniarlugit nunap inatsisaanut ilanngutassatut siunnersuuteqarsinnaanermut tunngasunik. Inatsisissatut siunnersuut una ilaatigut suliap taassuma malitsigaa, imaralugillu akileraarutitigut isertitassat innarlerneqanginnissaat siunertaralugu inatsisitigut allannguutissatut siunnersuutit allat. Inatsisissatut siunnersuummut aammattaq ilaapput allannguutissat erseqqissaatissallu akileraaruseriffiup ulluinnarni sulinermini paasisimasaanut tunngasut. Kalaallit Nunaata akileraartarnikkut maleruagassanik nutartigaasunik naleqqunnerusunillu, tassuunakkullu akileraarutitigut isertitassanik qulakkeerisunik peqarnissaa inatsisissatut siunnersuutip matuma qulakkiissavaa.

Ataatsimiittarnissani aggersuni inatsisissatut siunnersuutinik, Kalaallit Nunaanni inuussutissarsiutinik ingerlataqartunut atugassarititaasunik pitsaanerusunik tunngavissiuussinissamik siunertaqartunik siunnersuutip malitseqartinneqarnissaa naatsorsuutigineqarpoq. Suliaq taanna 2017-imut Aningaasaqarnikkut Ingerlatsineq pillugu Nalunaarusiami sukumiinerusumik allaaserineqarpoq.

Inatsisissatut siunnersuutip imarisai pingaernerit makkuupput:

- Aktiaateqarluni aamma piginneqataassuseqarluni ingerlatseqatigiiffiit Kalaallit Nunaanni aqutsisoqartut tamakkiisumik akileraartussaataitaanerannik erseqqissaaneq.
- Illuummik aalaakkaasumik tunisaqarnikkut isertitat killilimmik akileraaruteqaataasus-saanerannik erseqqissaaneq.
- Nunat takornartat sulisui il.il. Namminersorlutik Oqartussat ajornartorsiortoqartillugu qinnuiginninnerisigut ikiuukkiartorlutik Kalaallit Nunaanniittut, Kalaallit Nunaata Atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiuteqartoqartillugu ikiuinissaq pillugu isumaqatigiissummik qanittumi akuerseqataanermigut pisussaaffigilgai naapertorlugit akileraartinneqassangillat.
- Aktiaatillit inatsisit unioqqutillugit taarsigassarsiaasa akileraaruserneqartalermissaat, tassa aktiaatillit taarsigassarsiaat akileraartarneq eqqarsaatigalugu akissarsianut ilua-naarutinulluunniit naligiilersillugit.
- Unioqqutitsiniartoqarsinnaanera akiorniarlugu maleruagassaq, marloriaammik akile-raanginnissamik isumaqatigiissut unioqqutillugu akileraarutitigut iluaquteqarniarnis-saq siunertarinerullugu iliuuserineqarsimasunik, niuernernik il.il. itigartitsinissamut tungaviususaaq.
- Sulisunik atukkiussisoqartillugu akileraarutininik unerartitsisussaataitaanerup suliffeqar-fimmit sulisunik attartortumit isumagineqartussanngornissaanik aalajangersaaneq. Su-lisunik atukkiussinermi pineqarpoq inunnik ingerlatseqatigiiffimmi nunami allamiittumi sulisuusunik, suliffeqarfimmi Kalaallit Nunaanni angerlarsimaffeqartumi suliassamik suliqaartussanik atukkiussinerit.
- Inuit Namminersorlutik Oqartussanit, kommunimit il.il. naalagaaffiup avataanut suliartortinneqartut Kalaallit Nunaannut akileraartussaataitaanerannik erseqqissaaneq.
- Soraarnerussutisiaqarnissamut ileqqaakkat maanaanaq atorunnaarsinneqarneranni akileraarusiinnginnissamik atuutilersitsisoqassaaq, taamaalillutik ileqqaakkat 10.000 kr.-nit ikinnerusut § 46 naapertorlugit akileraarusigaanngitsumik maanaanaq tiguneqarsinnaalissallutik. Taarsiullugu aningaasanik tigusineq aningaasarsianit akileraarusiisarnerup ataniilissaaq.

2. Siunnersuutip imarisai pingaernerit

Aktiaateqarluni aamma piginneqataassuseqarluni ingerlatseqatigiiffiit Kalaallit Nunaanni inissisimasunik aqutsisoqartut tamakkiisumik akileraartussaataitaanerat

Aktiaateqarluni aamma piginneqataassuseqarluni ingerlatseqatigiiffiit maanna Kalaallit Nunaannut tamakkiisumik akileraartussaataitaasarput ingerlatseqatigiiffik, ingerlatseqatigiiffiit nalunaarsorneqarfianni Kalaallit Nunaanniittutut nalunaarsorneqarsimappat.

Ingerlatseqatigiiffimik piginnittut ilaasa ingerlatseqatigiiffiup Kalaallit Nunaata avataani angerlarsimaffeqartutut nalunaarsortinnissaa iluaqutiginiartarpaat, naak ingerlatseqatigiiffiup ingerlatai Kalaallit Nunaanni suliarineqaraluartut aqutsisuilu tassaniikkaluartut. Ingerlatat aalajangersimasumik ingerlatsivigisamiittutut nalinginnaasumik isigineqartarput. Kalaallit

Nunaanni aalajangersimasumik ingerlatsiviusumi sinneqartoorutit ingerlatseqatigiiffiit akileraarutaannik akileraaruserneqartarput. Kisianni sinneqartoorutit ingerlatseqatigiiffimmuut nunami allamiittumut nuunneqarneranni iluanaarutisianit akileraarutitik akiliisoqartanngilaq, naak ingerlatseqatigiiffimmik taassuminnga piginnittuiusut Kalaallit Nunaanni najugaqaraluartut. Tamanna naleqqutinngilaq, akileraarutitigullu iluanaarniarnermik nassataqarsinnaalluni.

Taamaammat siunnersuutaavoq ingerlatseqatigiiffiit Kalaallit Nunaanni aqutsisoqartut, ingerlatseqatigiiffiit Kalaallit Nunaanniittutut nalunaarsorneqarsimasut assigalugit tamakkiisumik akileraartussaataitaanissaat erseqqissarneqassasoq.

Pigisamik aalaakkaasumik tunisaqarnikkut isertitat nunami pissarsiarineqarfimminni akileraaruserneqartarnissaat

Inuit aamma inatsisitigut pisinnaatitaasut pisussaataitaasullu Kalaallit Nunaannut tamakkiisumik akileraartussaataitaanngitsut pigisamik aalaakkaasumik Kalaallit Nunaanniittumik pigisaqarnikkut isertitaminnit killilimmik akileraartussaataitaapput, tak. inatsimmi § 2, nr. 15. Aalajangersakkalli maanna oqaasertaligaanera pissutigalugu nalornissutaasinnaavoq pigisamik aalaakkaasumik Kalaallit Nunaanniittumik tunisaqarnikkut iluanaarutit aamma tassani pineqarnersut.

Taamaammat aalajangersakkap oqaasertaligaanera allanngortillugu, iluanaarutit aammattaq killilimmik akileraaruteqaataasussaannerannik erseqqissaanissaq siunnersuutigineqarpoq.

Tunisaqarnikkulli iluanaarutit inunnut akileraaruteqaataasussaanninnerat atuutiinnassaaq, pigisaq inuussutissarsiutissatut iluanaarniutissatullu pisiarineqarsimanngippat, tak. § 34, imm. 1, nr. 2. Iluanaarutit inatsisit naapertorlugit inuttut isigineqarsinnaasunut, tassa imaappoq aktiaateqarluni aamma piginneqataassuseqarluni ingerlatseqatigiiffinnut il.il. tassaapput iluanaarutit isertitatut akileraaruteqaataasussat.

Naalagaaffiup ikiuuttup sulisuisa, atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiuteqartoqartillugu ikiuinissaq pillugu isumaqatigiissut naapertorlugi ikiuuttut akileraartinneqannginnissaat
Atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiuteqartoqartillugu ikiuinissaq pillugu isumaqatigiissut Kalaallit Nunaata akuerseqataaffigaa. Isumaqatigiissutip siunertaraa qulakkiissallugu naalagaaffiit isumaqatigiissuteqaqataasut, atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiuteqartoqartillugu ikioqqullutik naalagaaffinnut isumaqatigiissuteqaqataasunut kikkunnulluunniit qinnuiginnissinnaanissaat.

Naalagaaffiit isumaqatigiissuteqaqataasut naalagaaffiup ikiuisup sulisuisa, sulisullu naalagaaffik ikiuisoq sinnerlugu sulisut akileraartinneqannginnissaat isumaqatigiissut naapertorlugu pisussaaffigaa.

Taamaammat inatsisissatut siunnersuutip aningaasarsianit akileraarutit pillugit inatsimmik allannguinnissaq siunertaraa, taamaalilluni Kalaallit Nunaata inuit taakku Namminersorlutik Oqartussat qinnuiginninnerat naapertorlugu pingaarutilimmik ikiuukkiartorlutik nunamiittut akileraartinneqannginnissaannik pisussaaffimminik eqquutsitsinissaa siunertaralugu.

Unioqqutitsiniartoqarsinnaanera akiorniarlugu maleruagassaaq

Unioqqutitsiniartoqarsinnaanera akiorniarlugu maleruagassamik nunat tamat atugassaannik, marloriaammik akileraannginnissamik isumaqatigiissummik unioqqutitsilluni akileraarutitigut iluaquteqarniarnissaq siunertarinerullugu iliuuseqartoqarsimappat, niuernernik il.il. akileraaruseriffiup itigartitsinissaanut tunngavissamik atuutilersitsinissaaq siunnersuutaavoq.

Marloriaammik akileraannginnissamik isumaqatigiissutit pingaarnertut siunertaraat marloriaammik akileraarusiisarnep nunarsuarmi atugaajunnaarnissaa, tassuunakkullu nioqqutissat sullissinerillu nunat akornanni niuerutigineqarnerat annertusarlugu aammalu aningaasaatit kiisalu inuit aamma inatsisitigut pisinnaatitaasut pisussaataitaasullu nunat akornanni nuuttarsinnaaqqullugit.

Marloriaammilli akileraannginnissamik isumaqatigiissutit akileraarusiinnginnissap marloriaammik atuunnissaanik kinguneqartussaanngillat. Taamaammat marloriaammik akileraannginnissamik isumaqatigiissutit siunertaasa aappaat tassaavoq, isumaqatigiissutit akileraanngitsoorniarnermut akileraarutitigullu peqquserlunnissamut aqquataannginnissaat.

Nunat OECD-mut ilaasut isumaqatigiissutigaat, naalagaaffiit aqqissuussinernut isumaqatigiissutit aalajangersagaanik atornerluinermik nassataqartunut peqataanerit marloriaammik akileraannginnissamik isumaqatigiissutit naapertorlugit iluaqutissinnissaat pisussaaffiginnikkaat. Tassa imaappoq nuussisarnep aqqissuussinerilluunniit ilaannut, akileraarutitigut iluanaarnarnerusumik pineqarnissaaq pingaarnertut siunertaralugu peqataanerit iluaqutissinnissaat marloriaammik akileraannginnissamik isumaqatigiissutikkut pissanngilaq, aammalu iluanaarnarnerusumik pineqarnissaaq anguniarlugu aalajangersakkat siunertaannut anguniagaasunullu akerliusumik atorreqassanngillat. Taamaattoqarnissaa pinngitsoorniarlugu naalagaaffiit unioqqutitsiniartoqarsinnaaneranik akiuiniarluni aalajangersakkanik nunap inatsisaani atuisinnaapput, unioqqutitsiniartoqarnissaalu akiorniarlugu aalajangersakkanik aalajangersimasunik isumaqatigiissutinut ilanngussisinnaallutik.

OECD marloriaammik akileraannginnissamut isumaqatigiissutissatut siunnersuummik suliaqarsimavoq, tassanilu allassimavoq naalagaaffiit, nunat tamat marloriaammik akileraartitsinnginnissamik sulissuteqarneranni aporfusinnaasut nalinginnaasut amerlanerpaartaat qanoq ili-ortlutik assigiiaartumik aaqqiissuteqarfigisinnaagaat. OECD-p siunnersuutaa marloriaammik akileraannginnissamik isumaqatigiissutissap qanoq iluseqarsinnaaneranik inassutitut suliaavoq. Siunnersuut inassuteqaataannaavoq, naalagaaffinnillu pituttuisuunani.

Kalaallit Nunaanni akileraartarnermi inatsisini, unioqutitsiniartoqarsinnaaneranik akiuiniarluni maleruagassamik nalinginnaasumik inatsisitigut aalajangersagaasumik atuuttoqannigilaq. Kalaallit Nunaanni (inatsisitigut) periaaseq malillugu akileraarusiineq pisarpoq qanorpiaq pi-soqarsimaneranik ataatsimoortumik nalilersuereernerup kingorna. Tamanna isumaqarpoq akileraarutitut tunngatillugu iliuuserineqartut siunertaqanngitsut piviusuunngitsullu atunngitsoortinneqarsinnaasut, tassungalu taarsiullugu illuatungaani piviusuusut naapertorlugit akileraarusiisoqassalluni. Tassa imaappoq Kalaallit Nunaanni akileraartarnermi inatsisit tunngavimmikkut nunat tamat ”pissusiviusunik takutitsinermik” tunngavigisaannut naapertuulluinnarput.

Unioqutitsiniartoqarsinnaanera akiorniarlugu maleruagassatut siunnersuutip oqaasertaata, si-unissami marloriaammik akileraarusiisarnermut isumaqatigiissutaajumaartussani piumasqaatinut, OECD-mit inassutigineqartunut naapertuuttunut sapinngisamik naapertuuttuunissaa pingaartinneqarpoq.

Unioqutitsiniartoqarsinnaanera akiorniarlugu maleruagassaq nalinginnaasumik atugassaa-voq, aammalu nuussinernut, niuernernut, pilersaarutitut, isumaqatigiissutitut il. il., akileraarutitigut iluaqutiginninniarnissamik pingaarnertut siunertaqartunut tamanut akileraaruseriffimmit atorneqarsinnaalluni.

Aalajangersakkatut siunnersuutaasoq maleruagassaareersunik unioqutitsiniartoqarnissaa pinngitsoortinniarlugu maleruagassanut akileraartarnermi inatsisimmi erseqqinnerusumik allassimasunut tapertaavoq, soorlu soqutigisaqatigiillutik illuatungeriit akornanni nuussinernut (transfer pricing – akinik aalajangersaanernut) imaluunniit ingerlatseqatigiiffiit piginneqatigiissut iluminni nuutsinermut akeqartitsineritut sammitinneqartunut. Maleruagassaareersunilli unioqutitsiniartoqarnissaa pinngitsoortinniarlugu maleruagassat erseqqinnerusumik allassimasut taakku naammangillat, ingerlatseqatigiiffimmi akileraanngitsoorniarlutik peruserisagaat allanngorartuupput.

Aktiaatillit taarsigassarsiaat

Aktiaatillit unioqutitsillutik taarsigassarsiaasa akissarsiatut iluanaarutisiatulluunniit akileraaruserneqarsinnaalernissaat inatsisissatut siunnersuutikkut atuutilersinneqassaaq. Akileraaruseriffiup arlaleriarluni paasisimavaa ingerlatseqatigiiffiit piginneqataassutsinik aktianilluunniit amerlanernik peqartunut taarsigassarsisitsisartut il.il. Aktiaatillit taarsigassarsineq assigiinngitsorpassuartigut pilersinnaavoq, assersuutigalugu ingerlatseqatigiiffik pingaarnertut aningaasaliisup inuttut nammineq aningaasartuutit akiliuteqarpat, imaluunniit pingaarnertut aningaasaliisooq pissarsiasaminut annertunerusunik ingerlatseqatigiiffimmit tigusaqartarsimappat.

Aktiaateqarluni ingerlatseqatigiiffiit pillugit inatsisip Kalaallit Nunaannut atuuttussanngortinneqarnera pillugu peqqussut (§ 115) aamma Piginneqataassuseqarluni ingerlatseqatigiiffiit pillugit inatsisip Kalaallit Nunaannut atuuttussanngortinneqarnera pillugu

peqqussut (§ 49) naapertorlugit ingerlatseqatigiiffiit aktiaatilinnut piginneqataassusilinnullu taarsigassarsisitsinissaat il.il. inerteqqutaavoq.

Aktiatillit taarsigassarsiaasa akileraaruserneqartarnissaat erseqqissoq akileraarusiisarnermi maanna atugaanngilaq. Taarsigassarsiat taamaattut qanoq pisoqarnera apeqqutaatillugu inatsimmi § 18 pisassarisanik utertitsinermut il.il. tunngasoq malillugu akileraaruserneqarsinnaapput, taarsigassarsiat aalajangersakkap erniat ikinnerpaaffissaannik piunasaqaataanik eqquutsitsinnippata. Pisumi tassani aktiaatillit unioqqutitsillutik taarsigassarsiaasa akileraarutitigut sunniutissaat taamaallaat tassaassapput taarsigassarsianik iluarsinerit. Akileraaruseriffik aammattaaq pisut ilaanni iliuuserineqartunik ataatsimoortumik naliliineq tunngavigalugu iliuuserineqartut pingaarnertut aningaasaliisup il.il. avataaniittutut suliaqarsinnaavoq, piunasaqaatit eqqortinneqarpata. Tamatumani piunasaqaataavoq pisorpiami nalilersorneqassasoq niuernikkut iliuuserineqartut nalinginnaanngitsut pineqarnersut, kiisalu iliuuserineqartut ingerlatseqatigiiffimmi il.il. qullersatigut sunnersimaneqarnikkut anguneqarsimansut.

Ingerlatseqatigiiffimmit pingaarnertut aningaasaliisumit taarsigassarsiat taamaattut nalinginnaasumik atuinermut ilaatigut atorneqartarput, taarsigassarsiat pingaarnertut aningaasaliisumit utertinneqarnissaat siunertaasarani. Akileraarutitigut iluaquteqarneq tassuuna pisarpoq, taarsigassarsiammi allanut taartaasutut taaneqarsinnaasut akileraaruserneqartanngimmata, tassa iluanaarutisiatut akissarsiatulluunniit.

Inatsisissatut siunnersuutikkut anguniarneqarpoq aktianik amerlanernik peqartut il.il. taarsigassarsiaasa iluanaarutisiatut akissarsiatulluunniit akileraaruserneqartalissasut, tamannalu amerlasuutigut akileraaruserneqartartut maannakkornit amerlanerulernissaannik kinguneqassaaq, aktiaatillimmi tunngaviusumik erniatigut iluaqutigiunnaakkatik kisiisa maanna akileraaruteqaatigisarpaat. Siunnersuut aammattaaq pisorpiami missiliuilluni naliliinermut ingerlatseqatigiiffinnut attuumassuteqanngitsoqarneranik naliliinermut attuumassuteqarneranit allaanerungaatsiarpoq.

Inatsisissatut siunnersuummi taamaallaat pineqarput inatsimmi § 86, imm. 3-mi aalajangersarneqartutuut anpartinik amerlanernik peqartut aamma aktianik amerlanernik peqartut. Tassa imaappoq, pineqartut tassaassapput aktiaatillit il.il. aktiatigut aningaasaatinik toqqaannartumik pigisaqarnermikkut aalajangiisuusutut oqartussaasut imaluunniit toqqaannanngitsumik, tassa aktiaatillit il.il. qanigisatik peqatigalugit pigisaqarsimappata, pigisaqarnermikkut aalajangiisuusutut oqartussaasut.

Aktiaatilinnut aalajangiisuusutut oqartussaannngitsunut taarsigassarsiarititat taamaalillutik aalajangersakkami pineqanngillat. Aammattaaq aktianik amerlanernik peqartumut il.il., atugasarititaasut nalinginnaasut naapertorlugit taarsigassarsiarititat inatsisissatut siunnersuummi pineqanngillat. Taakku tassaasinnaapput aningaaserivimmit taarsigassarsiat imaluunniit nammineq suliffeqarfiutigisami akileeqqaarani atugassarititaasut nalinginnaasut malillugit pisinerit.

Aalajangersakkamissaaq pineqanngillat taarsigassarsiat siulersuisut il.il. aktiaatilimmut an-partiutilimmulluunniit taarsigassarsiarititaat, ingerlatseqatigiiffimmi aktianik pisinermut atorpeqartut. Taarsigassarsiat taamaattut aktiaateqarluni ingerlatseqatigiiffiit pillugit inatsit aamma piginneqataassuseqarluni ingerlatseqatigiiffiit pillugit inatsit naapertorlugit inertequtaanngillat.

Sulisunik atukkiussisoqartillugu unerartitsisussaataaneq

Inatsisissatutaaq siunnersuut sulisunik atukkiussisoqarnerani kikkut akileraarutininik A-nik unerartitsisussaanerisa erseqqissarneqarnissaanik siunertaqarpoq.

Sulisunik atukkiussineq tassaavoq suliffeqarfiup nunami allamiittup inunnik Kalaallit Nunaanni najugaqanngitsunik Kalaallit Nunaanni suliassamik suliaqartussanik atukkiussinera. Sulisunik atukkiussisarneq ilaatigut sanaartornerup iluani nalinginnaasuvoq, aammali peqqinnissaqarfimmi atugaasorujussuulluni.

Tassunga tunngatillugu inatsisissatut siunnersuutip siunertai arlaliupput. Kalaallit Nunaannut akileraarutininik A-nik akiliisarnerup pisarnissaa qulakkeerneqassaaq, suliffeqarfiit nunanit allaneersut Kalaallit Nunaannut akileraarutininik A-nik akiliinnginnissamut atorpeqarnissaat pinaveersimatinneqassaaq aammalu akikitsumik akissarsiaqartitsilluni sulisitsinermik pinaveersimatitsissalluni. Kingullertut taaneqartoq pisinnaavoq sulisartut kalaallit sulisinneqarnermut atatillugu sulisartunut nunanit allaneersunut sanilliullutik ajornerusumik atugassaqartitaalersartut akileraarutininik akiliuteqannginnerup kingunerisaanik akikinnerulersitsisinnaasut.

Akileraaruseriffiup paasisimavaa unerartitsisussaataaneq pillugu aalajangersakkat maanna atuuttut naleqqutinngitsut, maleruagassammi kingunerimmassuk suliffeqarfiup nunami allameersup inunnik atukkiussisup aningaasarsianit akileraarutit A-t unerartinneqarnissaat isumagisussaagaa. Suliffeqarfik nunani allaneersooq Kalaallit Nunaanni naatsorsuuserisarneq, akileraarutininik A-nik unerartitsisarneq akiliisarnerlu pillugit maleruagassanik paasiniaananilu malinninngippat tamanna ajornartorsiortitsissaaq.

Taamaammat siunnersuutaavoq suliffeqarfiup imaluunniit inuup sulisunik attartortup sulisunik attartorneqartunik akissarsisitsinermi akileraarutit A-t pillugit naatsorsuusiornissaaq, unerartitsinissaaq akiliinissarlu isumagisassarissagai aalajangersarneqassasoq.

Aalajangersakkap nassataraa sulisumik attartortitsineq pineqarnerneq isumagisassarissagai namminerisamik sulineq il.il. nalilersorneqassasoq. Nalilersuineq taanna pisut piviusut aallaavigalugit pissaaq, aammalu isumaqatigiissut suliffeqarfiit akornanni qanoq taagorneqarnerneq aallaavigissanagu.

Suliaq kalaallit suliffeqarfiutaata imaluunniit inuup suliasaqarfiata ilaatut ilaanngippat, imaluunniit suliaq suliffeqarfimmut nunani allameersumut naammattumik tunngatinneqarsinnaappat tamanna ima isumaqassaaq sulisumik attartortitsineq pineqanngitsoq.

Sulisumik attartortitsineq pineqarnersoq qulaajarniarlugu ilaatigut isiginiarneqassapput

- Suliffeqarfik sorleq inummut ilitersuisussaataitaneq.
- Suliffeqarfik sorleq nakkutilliillunilu nakkutilliisussaataitaneq.
- Suliaq kimit akilerneqartussaallunilu ajutoortoqarnerani akisussaaffigineqassanersoq.

Sulisumik atukkiussineq pineqartoq paasineqarpat, akileraartarnermut tunngatillugu kalaallit suliffeqarfiutaat il.il. sulisitsisuusutut isigineqassaaq. Tamanna aamma aningaasarsianit akileraarutit pillugit inatsimmi § 2, nr. 1 malillugu sulisunut atukkiussanut qaqugukkut Kalaallit Nunaannut akileraartussanngortitsinissamut pingaaruteqarpoq.

Naalagaaffiup avataanut suliarortinneqartut akileraartussaataitaneqanneq erseqqissaaneq
Aalajangersakkakut erseqqissarniarneqarpoq inuit akileraartussaataitaneq. Naalagaaffiit aallartitaat pillugit Wienimi isumaqatigiissut naapertorlugu naalagaaffiit aallartitaasa Nunaminni aningaasarsiaminnit sunilluunniit nunami suliarortfimminni akileraartussaataitaneq. Inuit aallartitat akileraarutitigut taamatut iluaqutissinneqartarnerat isumaqatigiissutini allanissaaq aamma atuuppoq.

Akileraarusiisarnermi periusiuvoq inuit aallartinneqartut Kalaallit Nunaanni akileraartinneqartarnerat, taakkumi Kalaallit Nunaanni najugaqaannartutut isigineqartarmata. Aalajangersakkalli erseqqissarneqarnissaa kissaatigineqarpoq. Aalajangersakkami pineqartunut ilaapput aappaasut inooqataasut aallaqataasut aamma meeqqat ukiup aningaasarsiorfiusup aallartinnerani suli 18-iliisimangitsut taakkunani najugaqartut. Aalajangersakkap taamaalil-luni inuit aallartitaasut, Wienimi isumaqatigiissut malillugu nunami suliarortfimminni akileraartussaataitaneqinnerat pitsaanerusumik illuatungilerpaa.

Soraarnerussutisiaqarnissamut ileqqaakkat maanaannaq atorunnaarsinneqartut minnerpaaffissaat

Inuup soraarnerussutisiaqarnissamut ileqqaakkani maanaannaq atorunnaarsippagit akileraarut 55 pct.-iusoq akilerneqartussaavoq. Soraarnerussutisiaqarnissamut aqqissuussinerup maanaannaq atorunnaarsinneqarnissaata pilerinartuunissaa akileraarutikkut pinngitsoortinniarneqarpoq, soraarnerussutisiaqarnissamummi aqqissuussinerup siunertarerpiarmagu inuup soraarnerussutisiaqalernissamut katersaanut qaammatit kingulliit 23-t sinnerlugit

akiliuteqartoqarsimannippat, imaluunniit aaqqissuussinerup nalinga 10.000 kr.-init minneruppat.

Minnerpaaffissaq aningaasarsianit akileraarutit pillugit inatsisip allanngortinneqarnissaanik siunnersuummut Inatsisartut 2016-imi ukiakkut ataatsimiinneranni imm. 22-tut saqqummiunneqartumut ilaaqqaaraluarpoq. Aalajangersagarli allannguutissatut siunnersuutip pingajussaaneerseqarnissaata saqqummiunneqarneranut atatillugu kukkusoqarneratigut inatsisissatut siunnersuummit peerneqarsimavoq.

Inatsisissatut siunnersuut inatsimmuut atuuttumut sanilliullugu	
<i>Oqaasertai atuuttut</i>	<i>Inatsisissatut siunnersuut</i>
	<p style="text-align: center;">§ 1</p> <p>Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi, ilaatigut Inatsisartut inatsisaatigut nr. 3, 30. november 2009-meersukkut, Inatsisartut inatsisaatigut nr. 20, 18. november 2010-meersukkut, Inatsisartut inatsisaatigut nr. 37, 9. december 2015-imeersukkut, Inatsisartut inatsisaatigut nr. 7, 6. juni 2016-imeersukkut allanngortinneqartumi, kingullermillu Inatsisartut inatsisaatigut nr. 29, 28. november 2016-imeersukkut allanngortinneqartumi makku allannguutigittinneqarput:</p>
<p>§ 1 3) aktieselskabit anpartsselskabillu Kalaallit Nunaanniittutut nalunaarsorneqarsimasut,</p>	<p>1. § 1, imm. 1, nr. 3, ima oqaasertaqarpoq: ”3) aktiaateqarluni aamma piginneqataassuseqarluni ingerlatseqatigiiffiit Kalaallit Nunaanniittutut nalunaarsorneqarsimasut, imaluunniit Kalaallit Nunaanni aqutsisoqartut,”</p>
	<p>2. § 1, imm. 3-p kingornagut imm. 4-tut ilanngunneqarpoq: ”Imm. 4. Tamakkiisumik akileraartussaataaapput danskisut innuttaassuseqartut, § 1, imm. 1, nr. 1-imi 2-milu pineqartunut ilaanngikkaluarlutik Namminersorlutik Oqartussanit, kommuninit pisortalluunniit suliffeqarfiutaannit il.il. allanit, naalagaaffiup avataanut suliaartortinneqartut, aammalu nunat tamat isumaqatigiissutaat naapertorlugu nunami najorallakkaminni akileraartussaataaangitsut. Oqaaseqatigiit siullit malillugit akileraartussaataasunut ilaapput aappaasut inunnut taakkununga inooqataasut aamma meeqqat taakkunani najugaqartut, ukiup aningaasarsiorfiusup aallartinnerani suli 18-</p>

	<p>iliisimangitsut, aappaasut meeqqallu taakku danskisut innuttaassuseqarpata aammalu aningaasarsianit akileraarutinik, nunami takornartami maleruagassat inunnut tassani najugaqartunut atuuttut naapertorlugit akiliisussaataaangippata.”</p>
<p>§ 2 15) pigisamik aalaakkaasumik Kalaallit Nunaanni pigisaqartut imaluunniit tassannga isertitaqartut, imaluunniit</p>	<p>3. § 2, imm. 1, nr. 15, ima oqaasertaqarpoq: ”15) pigisamik aalaakkaasumik Kalaallit Nunaanni pigisaqartut tassanngaluunniit isertitaqartut, matumani aamma tunisaqarnikkut, imaluunniit”</p>
	<p>4. § 3, imm. 1, nr. 8-p kingornagut <i>nr. 9-tut</i> ilanngunneqarpoq: ”9) Inuit Atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiuteqartoqartillugu ikiuinissaq pillugu isumaqatigiissut naapertorlugu ikiuuttut, aatsaalli inuit pineqartut inatsimmi § 1, imm. 1, nr. 1-2-mi pineqartunut ilaanngippata.”</p>
	<p>5. § 16-ip kingornagut ilanngunneqarpoq: ”§ 16 a. Ingerlatseqatigiiffik il.il. § 1, imm. 1, nr. 3-mi 4-miluunniit pineqartunut ilaasoq, kiisalu ingerlatseqatigiiffik il.il. taamaaqataa nunani allani angerlarsimaffeqartoq aningaasanik inummut, toqqaannartumik toqqaannangitsumilluunniit atugassaqartitsippat, taarsigassarsisitsippat qularnaveeqqu-siippalluunniit, taarsigassarsiat aningaasarsianit akileraarutit pillugit inatsimmi maleruagassat nalinginnaasut naapertorlugit tigusatut taarsigassaangitsutut isigineqassapput, aatsaalli taarsigassarsisitsisoq taarsigassarsisorlu § 86, imm. 3-mi pineqartutuut imminnut attuumassuteqarpata. Oqaaseqatigiit siulliit taarsigassarsianut il.il. nalinginnaasumik niuernermit atatillugu taarsigassarsiari-tinneqartunut il.il., imaluunniit aningaaserivinnit taarsigassarsisitsisarfinnillu taarsigassarsianut nalinginnaasunut atuutinngillat. Oqaaseqatigiit siulliit aamma atuutinngillat Aktiaateqarluni ingerlatseqatigiiffiit pillugit inatsisip Kalaallit</p>

	<p>Nunaannut atuutilersinneqarnera pillugu peqqussummi § 115 a naapertorlugu aamma Piginneqataassuseqarluni ingerlatseqatigiiffiit pillugit inatsisip Kalaallit Nunaannut atuutilersinneqarnera pillugu peqqussummi § 50 naapertorlugu taarsigassarsianut.</p> <p><i>Imm. 2.</i> Taarsigassarsiat imm. 1 naapertorlugu akileraaruserneqartut taarserneqarpata, aningaasat taarserneqartut ingerlatseqatigiiffiup aningaasarsiaasa akileraaruteqaataasussat naatsorsorneranni ilanngunneqassanngillat.”</p>
	<p>6. § 46, <i>imm. 6</i>-ip kingornagut <i>imm. 7</i>-itut ilanngunneqarpoq:</p> <p>”<i>Imm. 7.</i> Imm. 1 aamma 2 atuutissanngillat soraarnerussutisiaqarnissamut inuunermulluunniit sillimmasiinermik aaqqissuussinermut imaluunniit soraarnerussutisiaqarnissaq siunertaralugu ileqqaakkanut piffissami qaammatinit 23-nit sivisunerusumi akiliuteqartoqarsimanngippat, imaluunniit aaqqissuussinerup ileqqaakkalluunniit piffissami atorunnaarsitsiffiusumi nalinga 10.000 kr.-init minneruppat.”</p>
	<p>7. § 69-ip kingornagut ilanngunneqarpoq:</p> <p>”§ 69 a. Akileraartussaataasut marloriaammik akileraarnissaq pinngitsoorniarlugu isumaqatigiisummik iluaquteqassanngillat, pissutsit pisullu soqutiginaatillit tamaasa eqqarsaatigalugit aalajangerneqarsinnaasorinarpat iluaqutiginninniarneq, aaqqissuussinerni suniluunniit imaluunniit nuussinerni suniluunniit toqqaannartumik toqqaannangitsumilluunniit iluaqutiginninnermik kinguneqartoq siunertat pingaernerit ilagigaat, aatsaalli pisut taakku apeqqutaatillugit iluaqutiginninnissamik akuerineqarnissap, isumaqatigiisummi aalajangersakkap pineqartup imarisaanut siunertaanullu naapertuuttuunera uppersarneqanngippat.”</p>
	<p>8. § 75, <i>imm. 1, nr. 2</i>-p kingornagut <i>nr. 3</i>-tut</p>

	<p>ilanngunneqarpoq: ”3) § 46, imm. 7 naapertorlugu tunniunneqartut.”</p>
<p>§ 75 2) toqusut pigisaat, peqatigiiffiit imaluunniit suliffeqarfiit tamanut iluaqusiiniarlutik imaluunniit tamanut ajunngitsuliornissamik suliaqartut Kalaallit Nunaanni eqqartuussisoqarfimmik najugaqarfeqanngitsut, taamaattorli tak. § 76, imm. 4.</p>	<p>9. § 75, imm. 3, nr. 2-mi allassimasoq ”76, imm. 4” allanngortinneqarpoq ima ”76, imm. 5”</p>
<p>§ 76 <i>Imm. 4.</i> Aningaasarsianit pineqartunik akiligassa-qartitaasoq Kalaallit Nunaanni eqqartuussisoqarfimmik najugaqarfeqanngippat tunniussinerlu taamaaliornissamut piginnaatitaasumit Kalaallit Nunaanni eqqartuussisoqarfimmik attavigisaqartumit isumagineqarpat piginnaatitaasoq taanna unerartitsisussaavoq. <i>Imm. 5.</i> Naalackersuisut malittarisassiorsinnaaput unerartitsisussaaitap akileraarutit A-nik naatsorsuinermini aningaasat akileraarutit naatsorsorneqarfissaat koruuninut 10-mik agguarneqarsinnaasumut qaninnerpaamut ammut akunaallissagai. <i>Imm. 6.</i> Akileraarutit A-t unerartitassat minnerpaamik killissaat Naalackersuisut aalajangersinnaavaat.</p>	<p>10. § 76, imm. 3-p kingornagut imm. 4-tut nutaatut ilanngunneqarpoq: ”Imm. 4. Inummut, suliffeqarfimmit nunami maani angerlarsimaffeqanngitsumit nunami maani sulisussatut atukkiunneqarsimasumut akissarsianik tunniussinermi unerartitsisussaaitaaneq suliamik sullinneqartup isumagisassaraa. Tamannali taamaallaat atuuppoq suliaq suliffeqarfiup nunami maani ingerlataata ilagippagu. Suliffeqarfik nunami maani angerlarsimaffeqanngitsoq inuup aningaasarsiai A-t, paasissutissallu allat pineqartup akileraarutaasa A-t nalunaarutigineqarnissaannut, unerartinneqarnissaannut akilernerqarnissaannullu pingaarutillit pillugit uppersaatitunik tunniussaqaanngippat, suliamik sullinneqartup akileraarutit A-t akiligassanit tamarmiusunit naatsorsussavai. Oqaaseqatigiit siulliit atuutissanngillat suliffeqarfik nunami, Namminersorlutik Oqartussat akileraarutitunerartitsisarneq pillugu ikioqatigiinnissamik isumaqatigiissuteqarfigisaani angerlarsimaffeqarpat, tak. § 114, imm. 2, nr. 3.”</p> <p>Imm. 4-6 matuma kingorna tassaalerput imm. 5-7.</p>
	<p style="text-align: center;">§ 2</p> <p><i>Imm. 1.</i> Inatsit 1. juli 2017-imi atortuulissaaq. <i>Imm. 2.</i> § 1, nr. 1, nr. 3, 4 aamma 7 ukiumi aningaasarsiorfiusumi 2017-imi aningaasarsiat akileraaruteqaataasussat naatsorsorneranni atuutissapput. <i>Imm. 3.</i> § 1, nr. 5 taarsigassarsianut 1. januar</p>

	<p>2017 aallarnerfigalugu taarsigassarsiaritinneqartunut atuutissaaq. <i>Imm. 4. § 1, nr. 10, 1. januar 2018</i> aallarnerfigalugu atuutissaaq.</p>
--	---

3. Pisortanut aningaasatigut allaffissornikkullu sunniutissai

Aktiaatillit taarsigassarsiaasa akileraaruserneqartalernerisigut isertinneqartussat ukiumut 5 mio. kr.-nit missinginik amerlassuseqassanganneqarput. Akileraarutitigut isertinneqartussat taarsigassarsiat taamaattut iluanaarutisiatut akissarsiatulluunniit akileraaruserneqarnerisigut isertinneqassanganneqarput. Aamma naatsorsuutaavoq inatsisissatut siunnersuut maleruagassat malinneqarnerunissaannik nassataqassasoq, tassuunakkut aamma aktianik amerlanernik peqartut iluanaarutisiaannik akissarsiaannilluunniit akileraarusiinerit amerlanerulissasoq, aktiaatillimmi unioqqutitsillutik taarsigassarsinerisigut akileraarutissat ikinnerusinnaanerat tassuunakkut millisinneqassamat.

Allannguutit allat, pingaartumik sulisunik atukkiussinermut aamma pigisamik aalaakkaasumik tunisaqarnikkut iluanaarutinit akileraartussaataitanermik erseqqissaanerit eqqarsaatigalugit isertinneqartussat eqqoqqissaartumik angissusileruminaapput. Taakkunuunatigulli isertinneqartartussat katillugit 5 mio. kr.-it missaanniissanganneqarput. Isertinneqartartussalli ukiumiit ukiumut allanngorangaatsiarsinnaapput.

Inatsisissatut siunnersuut pisortanut allaffissornikkut sunniuteqangaassanganneqanngilaq.

4. Inuussutissarsiutinik ingerlataqartunut aningaasatigut allaffissornikkullu sunniutissai

Inatsisissatut siunnersuutip unerartitsisussaataitanerit pillugit aalajangersagaasa kingunerissa-vaat suliffeqarfiit il.il. Kalaallit Nunaanniittut inuit ingerlatseqatigiiffimmit nunamit allameersumit atukkiussat akissarsiaanit (inuttat akissarsiaannit il.il.) akileraarutininik A-nik unerartitsisussaanerit. Tamanna suliffeqarfiit Kalaallit Nunaanniittut allaffissornikkut suliassaasa annertoorsuunngitsumik amerlinissaannik kinguneqassaaq.

Unioqqutitsiniartoqarsinnaanera akiorniarlugu maleruagassamik siunnersuutip inuussutissarsiutinik ingerlataqartunut aningaasatigut allaffissornikkulluunniit sunniuteqangaarnissaa naatsorsuutigineqanngilaq. Aalajangersagaq taamatut oqaasertaligaalluni qaqutiguinnaq atorneqarsinnaavoq, tassa aqqissuussineq il.il. marloriaammik akileraannginnissamik isumaqatigiissummi siunertarinqanngitsumik akileraarutitigut iluaqutissarsinissamik pingaarnertut siunertaqarsimatillugu.

Siunnersuutip aktiaatillit taarsigassarsisarnerat pillugu aalajangersagai, aktianik amerlanernik peqartup il.il. suliffeqarfimmi taarsigassarsisimanerani aktiaatillit taarsigassarsiaasa taakku akileraaruserneqarnerusalernerannik kinguneqassanganneqarput. Inatsisissatulli siunnersuut inuussutissarsiutinik ingerlataqartunut tassuunakkut sunniuteqangaartussaannilaq,

ingerlatseqatigiiffiimmi akissarsianut iluanaarutisianulluunniit aningaasartuutit ingerlatsinermi aningaasartuutit ilanngaatisinnaammatic.

Inatsisissatut siunnersuut inuussutissarsiutinic ingerlataqartunut taakku saniatigut sunniuteqangaassangatinneqanngilaq.

5. Avatangiisinut, pinngortitamut inuillu peqqissusiannut sunniutissai

Inatsisissatut siunnersuut pinngortitamut inuillu peqqissusaannut sunniuteqassangatinneqanngilaq.

6. Innuttaasunut sunniutissai

Unerartitsisussaataaneq pillugu inatsisissatut siunnersuummi malittarisassat ima kinguneqassapput, inuit il.il. nunani allani suliffeqarfinit sulisussatut atukkiunneqartut, akissarsianit (akissarsiat il.il.) akileraarutinic A-nik akileraartassat. Tamanna pisuni ikitsuararsuarni taamaallaat pisassasoq naatsorsuutigineqarpoq.

Aktiaatillit taarsigassarsiaat pillugit maleruagassat anpartinic amerlanernik aamma aktianik amerlanernik peqartut, ingerlatseqatigiiffiutiminni unioqutitsillutik taarsigassarsisimasut akileraarusiiffigineqarnerunerannik kinguneqassapput. Aktianik amerlanernik peqartut il.il. nalinginnaasumik maleruagassat maanna atuuttut malillugit taamaallaat erniatigut iluaqutigiunnaakkaminnik akileraarusiiffigineqartarput. Taarsigassarsiat taamaattut inatsisissatut siunnersuut naapertorlugu iluanaarutisiatut akissarsiatulluunniit akileraaruserneqartassapput. Akileraarusiisalernissamat tassunga atatillugu aktianik amerlanernik peqartup aammattaaq erniaannut aningaasartuutit ilanngaaticigisinnaajunnaassavai.

Inatsisissatut siunnersuut innuttaasunut taakku saniatigut sunniuteqangaassangatinneqanngilaq.

7. Sunniutissai pingaarutillit allat

Inatsisissatut siunnersuut pingaarutilinnik allanik sunniuteqassangatinneqanngilaq.

8. Oqartussaasunik kattuffinnillu il.il. tusarniaaneq

Inatsisissatut siunnersuut ulloq 13. januar 2017-imi KANUKOKA-mut, Kommuneqarfik Sermersuumut aamma Sulisitsisunut allanullu oqaaseqarfigisassanngorlugu danskisuaa nassiunneqarpoq.

Siunnersuut tusarniaassutigalugu nassiunneqarpoq ulloq 30. januar 2017, tusarniaanermut akissuteqarfissatut piffissaliullugu 15. februar. Kommunilli aamma KANUKOKA tusarniaanermut akissuteqarnissaminnut ulloq 7. marts tikillugu sivitsuiffigineqarput.

Tusarniaanermi akissutigineqarumaarsinnaasut, inatsisissatut siunnersuutip Inatsisartunut tunniunneqareernerani tiguneqartut, naleqquttuunerat naapertorlugu iluarsiiussummut ilanngunneqarumaarput.

Siunnersuut piffissami 31. januaarimiit – 15. februaarip tungaanut tusarniaavimmiippoq. Siunnersuut susassaqtartunut makkununga nassiunneqarsimavoq:

SIK, Sulisitsisut (GE), Deloitte, Grønlands Revisionskontor, BDO, NUSUKA, KANUKOKA, Kommuneqarfik Sermersooq, Naalakkersuisut Siulittaasuata Naalakkersuisoqarfia, Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoqarfik, GrønlandsBANKEN aamma BankNordik

Tusarniaanermi akissuteqarput KANUKOKA, Deloitte, Sulisitsisut, Aatsitassanut Ikummatissanullu Naalakkersuisoqarfik aamma Nunatsinni Advokatit.

Tusarniaaffigineqartut oqaaseqaataat pingaarnersiorlugit aaqqissuullugit naalisarlugillu ataani nalinginnaasumik allannilimmik allanneqarput, Naalakkersuisut oqaaseqaataat *uingasumik* allanneqarlutik.

Tusarniaanermi akissutigineqartut makkuninnga oqaaseqaateqarfiupput:

KANUKOKA

KANUKOKA-p maluginiarpaa inatsisissatut siunnersuut una aningaasarsianit akileraarutit pillugit inatsisip aqqanilissaannik allannguutigissagaa, aammalu ilanngullugu maluginiarlugu inatsisissatut siunnersuutip oqaaseqaatitaani allassimasoq inatsisartut siunissami ataatsimiinnerini inatsisissatut siunnersuutiniq allanik saqqummiussisoqassamaartoq.

KANUKOKA-p akileraartarnermut inatsimmut tunngatillugu ileqqunngoriartortoq eqqarsarnartoqartillugu oqaatigaa. Inatsimmik allannguisarnerit amerligaluttuinnartut innuttaasunut, inuussutissarsiortunut aammalu oqartussanut inatsisinik taakkuninnga atuisuusussanut ajornakusoorneruleriartortippaat inatsisit pineqartut malittarisassartaasa eqqortumik paasiniartarneri. Tamanna akileraartarnikkut immikkut ilisimasalinnik, nunami maani pigineqanngitsunik, pinngitsuuisinnaajunnaarnissamik pilersitsissaaq. Aammattaaq tamanna ima kinguneqarsinnaavoq Akileraartarnermut Aqutsisoqarfiup kisermaassilluni malittarisassat qanoq paasineqarnissaannik nassuiaasartunngorneranik.

KANUKOKA-p Aningaasaqarnermut Naalakkersuisoq kaammattorpaa pissusinngoriartortoq tamanna qanoq iliornikkut unitsinneqarsinnaanersoq isumaliutigeqqullugu. KANUKOKA-p naliliinera malillugu tamanna pisinnaavoq inatsisinik allannguisarnerit pitsaanerusumik pilersaarusiorneqartarnerisigut, aamma taamaaliornikkut inatsisinik allanngunerit ataatsimoortunngorlugit katersorneqarlutik, taamaalillutillu akileraartarnermut malittarisassat imminnut ataqatigiinnerat qulakkeerneqarnerusinnaassalluni.

Oqaaseqaat toqqaannartumik inatsisissatut siunnersuutip imarisaata pineqarneranik taaneqarsinnaanngilaq.

Naalackersuisut pingaartitaat tassaavoq inatsimmik suliaqarnissaq, taamaaliornikkut taassuma inuiaqatigiinni atuuffissamini naleqquttuunissaa anguniarlugu. Tamanna pingaartumik akileraartarnermut inatsimmut tunngavoq, suliassaqarfik tamanna ingerlaavartumik ineriartorfiummat, aammalu pingaartuulluni inatsisip sapinngisamik piffissami atuuffimminut naleqquttuunissaa. Inatsisissatut siunnersuut akileraartarnermut inatsisip amigaataanik matooriniutitut siunertaqarsinnaavoq, aammali siorngiisinnaassuseqarnissamik annertusaanermut atorneqarsinnaalluni, taamaaliornikkullu nunami innuttaasut aamma inuussutissarsiortut inatsisitigut pisinnaatitaaffii ilanngullugit. Akileraartarnermut inatsimmik suliaqarneq ingerlaavartumik suliassaavoq, naammassinngisaannartussa. Tulluartuunaviannngilaq inatsisissatut siunnersuutit ataatsikkut amerlasuunngorlugit katersorneqarnissaat, tamanna inatsisit allannguutissaannik pingaarutilinnik kinguarsaanermik kinguneqarsinnaammat, kiisalu inatsisissatut siunnersuutit anginerulerlutillu ajornakusoornerulersinnaallutik.

KANUKOKA-p kaammattuutigivaa malittarisassanik danskit malittarisassaasa assiffaariinik imalinnik malittarisassaliornissamik Naalackersuisut kissaateqarunik tamanna inatsisissatut siunnersuutip oqaaseqaatitaani erseqqissaatigineqartassasoq.

Naalackersuisut assersuutigalugu inatsisip nassuiarneqarnerani il.il. pingaaruteqassusissaa apeqqutaatillugu siunnersuut nunani allani inatsisit aallaavigalugit suliarineqarsimappat nalunaarutiginiartassavaat.

Akileraarutininik aallerfiusartut illersorneqarnissaannik inatsisissatut siunnersuummi tunngavigineqartoq KANUKOKA-p tunngaviummik tapersorsorpaa. KANUKOKA-li aamma isumaqarpoq, taama siunertaqarluni malittarisassanik nutaanik atuutilersitsinermi ingerlaavartumik isiginiarneqassasoq kalaallit suliffeqarfiisa aamma pisortani oqartussat Danmarkimi nunanilu allani suleqatigisat akornanni allannguinermut atatillugu akileraartarnikkut aporfissanik pilersitsisoqannginnissaa.

Akileraartarnermut tunngasutigut inatsisissatut siunnersuummik suliaqarnermi pingaartinneqartorujussuuvooq inatsisissatut siunnersuutit atorneqarsinnaasuunissaat, aammalu nunani allani suliffeqarfinnik il.il. suleqateqarnissamik aporfilersuutinik pilersitsinnginnissaat. Tamanna aammattaaq attuumassutilinnut tusarniaanikkut qulakkeerniarneqartarpoq.

KANUKOKA-p siunnersuutigivaa § 1, imm. 4-mut ”naalagaaffiup avataani sulinissamut aallartitaq” pillugu siunnersuut inatsisissatut siunnersuutip oqaaseqaatitaani erseqqinnerusumik nassuiarneqassasoq. Aalajangersagaq kalaallinut nunani allani danskit aallartitaqarfiini sulisussatut aallartinneqartunut akileraartarnermut inatsisitigut qanoq

inissimasoqarnersoq nalornissutinngorsinnaammat. Tulliatut KANUKOKA isumaqarpoq taaguut ”allartitaq” erseqqinnerusumik nassuiarneqartariaqartoq, KANUKOKA-p naliliinera naapertorlugu tamatumani ersernerluttoqarsinnaammat, tassunga ilanngullugu assersuutigalugu sulisunut nunani allani sulinissaq siunertaralugu akissarsiaqaratik suliffimminnit sulinngiffeqartunut.

Ilaannakortumik akuersaarneqarpoq. Taaguut ”aallartitaq” aalajangersakkamut oqaaseqaatini assersuusiorfigalugu erseqqissaatigineqarpoq. Aalajangersakkami oqaasertaliunneqartutut nassuiarneqarnissaata ajornartorsiutaalernissaa ilimagineqannigilaq, aalajangersagaq inunnut nunami aallartitatut suliffigisami akileraartussaataaangitsunut taamaallaat tunngatinneqartutut killilerneqarmat. Inuk aallartitaq nunami aallartitatut suliffigisamini akileraartussaataatillugu aalajangersagassatut siunnersuummi Kalaallit Nunaannut akileraartussaataaassanngimmat.

KANUKOKA aammattaaq isumaqarpoq taaguutit ”Namminersorlutik Oqartussat, kommunit imaluunniit pisortani ingerlatsiviit allat il.il.” erseqqissarneqartariaqartoq, suliffeqarfiit namminersortuutitat inatsimmi aamma pineqarnersut qularnaarumallugu.

Suliffeqarfiit namminersortuutitat Namminersorlutik Oqartussat ilagivaat, taamalu taaguummi ”Namminersorlutik Oqartussat, kommunit aamma pisortani ingerlatsiviit allat il.il. ilaallutik.

Siunnersuummi § 2, nr. 15-imut, illuutinut tunngasumut tunngatillugu, KANUKOKA-p paaserusuppaa erseqqissaaneq ima paasineqassanersoq illuutininik tunisinermi isertitanit iluanaarutinik killilimmik akileraartussaataaannermik kinguneqassasoq. Taamaassimassappat ajornartorsiutitaqarsinnaasorinarpoq nalikillilerneqarsinnaanngitsunik tunisinermi nalinginnaasumik akileraartoqassanngippat, aamma killilimmik akileraartussaataaneq illuummik pigisaqarnermi taamaallaat pinngorsinnaappat erseqqissaateqarneq paasiuminaalluni.

Oqaaseqaat allanngortitsinissamik pissutissaqalersitsinngilaq. Aalajangersagaq malittarisassaavoq inummut akileraartussaannermut tunngasoq. Inatsimmi § 34, nr. 2 naapertorlugu inuit pigisaminnik tunisinerat akileraartussaataaannermut ilanngunneqannigilaq, tamatumani pineqanngippata pigisanik nalikillilerneqarsinnaasunik tunisaqarnermi aamma pigisanut akileraartussaataaasup inuussutissarsiutini imaluunniit iluanaarniutigalugu pissarsiaanut tunngasut. Aalajangersagassatut siunnersuutip tamanna allanngortinngilaa. Aammattaaq qulaani immikkoortoq 2-mi oqaaseqaatit innersuussutigineqarput.

KANUKOKA isumaqarpoq, § 69-itut siunnersuut, unioqqutitsiniartoqarsinnaaneranik akiuinissamut nunani tamalaani malittarisassamut tunngasoq, allaqqinneqassasoq, siunertarineqartoq erseqqinnerusunngortillugu: Taamaasilluni siunnersuutigineqassaaq

aallarniut ”akileraartussaataitaasut iluaqutissarsisinnaanngillat” allanngortinneqassasoq imaasillugu ”akileraartussaataitaasut iluaqutissarsivigisinnaanngilaat”. Siunnersuut pissuteqarpoq inatsisini malittarisassat imatut atuarneqarsinnaasut inatsit isummertoq suut innuttaasumut iluaqutaassanersut pinngitsoortariaqarmata, innuttaasut namminneq nalunnginnerusarmassuk suut imminnut iluaqutissaanersut.

Oqaaseqaat ilanngunneqanngilaq. KANUKOKA-p allannguutissatut tunngavilersuutaa aalajangersakkap imarisaanut tunngassuteqanngilaq, aammalu allannguutissatut siunnersuut sammisamut pingaarutilittut isigineqarani. Aalajangersakkamut oqaasertaliunneqartoq OECD-p unioqqutitsiniartoqarsinnaanera akiorniarlugu malittarisassaata oqaasertaanut tulluarsarneqarnissaa siunertaralugu suliarineqarpoq.

Deloitte

§ 16 a-mut siunnersuummut, aktiaatilinnut attartortitsisarnermut tunngasoq. Deloitte-p maluginiarpa, kalaallit aningaasarsianit akileraarutit pillugit inatsisaannut naleqqussarlugu danskit akileraartarnermut inatsisaani § 16 e assileqqissaarlugu suliarineqarsimasoq, aammalu inatsisip oqaasertarpiaanut oqaaseqaatissaqarnatik.

Deloittelli paasissallugu pissusissamisoorivaa, Kalaallit Nunaanni akileraartartoq danskit akileraartarnermut ilitersuutaannit (Inatsisitigut ilitersuut) qanoq ikiorneqartigisinnaanersoq, saqqummersitami 2017-1 immikkoortoq C.B.3.5.3.3-mi malittarisassap qanoq paasineqarnissaannik takisuumik ilitersuutitaqartoq, tassunga ilanngullugu assersuutigalugu erseqqissaatit aktianik amerlanernik pigisaqartoq kukkusumik sullinneqarnermi, suliffeqarfiup akiliutitut kortianik atuinermi, assersuutigalugu sulinermut atatillugu angalanermi/ajornartoornermi, namminerisamik akiliutitut korterisap atorsinnaannginnerani aamma pissarsiaassanik tigusinermi il.il. qanoq iliussanersoq.

Danmarkimi aamma Kalaallit Nunaanni assigiimmik, imaluunniit assigiingajattumik inatsisitigut aalajangersagaqartillugu pingaartumik danskit inatsisilik atuinerat aningaasarsianit akileraarutit pillugit inatsimmi aalajangersakkat qanoq paasineqarnissaannik nassuiaataat atussallugit naleqqutissapput. Danmarkimi SKAT-i ingerlaavartumik Juridisk Vejledningimik (Akileraartarnermut ilitersuummik taaneqakkajuttartumik) saqqummersitsisarpoq. Juridisk Vejledningi tassaavoq danskit akileraartarnermut oqartussaasuisa Danmarkimi akileraartarnikkut malittarisassat qanoq paasineqarnissaat pillugu nassuiaataat. Iltersuut danskit akileraartarnikkut oqartussaasuinut pituttuisuuvoq, ilitersuutip imarisai inatsisitigut qaffasinnerusumi inissisimasuni malunnaatilimmik allaanerussuteqanngippata.

Iltersuulli kalaallit akileraartarnermut oqartussaasuinut pituttuisuunngilaq, aammalu kalaallit akileraartarnikkut inatsisaata qanoq paasineqarnissaannik inatsisitigut tunngavissaanani. Akileraartarnermut ingerlatsivimmi sulisut ilaatigooriarlutik SKAT-p Juridisk Vejledningia isumassarsiorfigisarpaat, kalaallit akileraartarnermut

malittarisassaasa qanoq paasineqarnissaannik paatsuunganartoqartillugu. Tamanna ilaatigut pissuteqartarpoq Juridisk Vejledningip oqaasertalersorneqarnera amerlasuutigut suliaasaqarfimmut tunngatillugu pitsaasumik pitsaassuseqartarmata, ilaatigut tamanna suliaasaqarfiit ataasiakkaat iluini immikkut ilisimasaqartunit allanneqartarnera pissuteqarluni.

Deloitte-p pingaaruteqartutut isigivaa, oqaaseqaatini erseqqissumik allassimassasoq aktianik amerlanerusunik pigisaqartoq unioqquutitsisumik attartortoqarneranik taaneqarsinnaasumik naatsorsuuserinermi paasisaqartoq, aammalu taamaalilluni siunnersuutigineqartut malillugit akileraarusigassaasunik, naatsorsuutinik iluarsisuteqartitsisinnaasoq, attartorneq akissarsiatut imaluunniit iluanaarutitut akiliutigineqartutut aningaasartuutitut allassimalersillugu, tamatumunnga piunasaqaatit malinneqarsimappata, tamanna aktianik amerlanerusunik pigisaqartumut imaluunniit suliffeqarfimmut akileraarutitigut allamik kinguneqartinngikkaluarlugu.

Akileraartarnermut ilitsersuummi qulaani taaneqartumi tamanna ima allassimavoq: ”Pissarsiassat suliffeqarfiuteqarnermut inatsisit naapertorlugit sulisumut aktianik amerlanerusunik pigisaqartumut agguagarsiassatut tunniunneqarpata taamaaliornikkut pissarsiassanik akileraarusigassanik agguagarsisitsisoqanngilaq. Sulisorisaq amerlanerusunik aktiaatilik taamaalilluni suliffeqarfiuteqarnermut inatsisit naapertorlugit pissarsiassaritinneqartunut akileraartussaataitaanngilaq.

Taamaalilluni sulisorisaq amerlanerusunik aktiaatilik pissarsiassanik imminut agguagarsitippat taanna taamaallaat ataasiartumik attartukkanik akileraaruserneqassaaq. Ataatsimilli piunasaqaatitaqarpoq, suliffeqarfiuteqarnermut inatsisit malillugit pissarsiassanik agguagarsititsisoqarsinnaassasoq aamma suliffeqarfiup pigisanik allanik, aningaasaatinit allaanerusunik, agguagarsititsisarnermut aalajangersakkat nalinginnaasut eqqumaffigissagai.

Tamanna aamma atuuppoq pissarsiassat amerlanerusunik aktiaatilimmut aningaasarsiatut nuunneqarpata.”

Deloitte-p ilanngullugu oqaatigaa ilitsersuummi aalajangersagaq iluarsiinialuni malittarisassaliaasoq, amerlanerusunik aktiaatilimmut marloriaammik akileraarnissap pinngitsoortinnissaanik periarfissiisoq. Deloitte-p Akileraartarnermut Aqutsisoqarfik ilitsersuummik immikkut ittumik saqqummiussinissaa naatsorsuutiginnimmagu siunnersuutigaarput aalajangersagaq taanna oqaaseqaatinut ilanngunneqassasoq.

Oqaaseqaat ilaannakortumik akuersaarneqarpoq. Allassimasutut issuarneqartoq ilanngunneqanngilaq, oqaaseqaatilli immikkut ittut itisilerneqarput, ajornartorsiut pitsaanerusumik erseqqissaassutiginiarlugu. Pingaartoq tassaavoq, attartorneq § 16 a malillugu akileraaruserneqarpat § 16 a, tamanna iliuuserineqartut tamarmik

akileraartarnermut atatillugu akileraartarnermut inatsisit malillugit suliarineqarnissaannik tunngaveqassammat.

Deloitte isumaqarpoq, aktiaatilinnut attartortitsinermit malittarisassanik atuutilersitsinissamik ulluliussaq ulloq 1. januar 2017 aarlerinaateqartoq, inatsisitigut illersorneqarnissaq eqqarsaatigalugu. Deloitte-p paasinninnera naapertorlugu nunami inatsisit tunngavigalugit ingerlatsiviusumi imaattariaqarpoq, innuttaasup ilisimasariaqaraa iliuuserineqartoq qanoq ittoq qanoq kinguneqassanersoq. Amerlanerusunik aktiaatilik ima inissisimalersinnaavoq amerlanerusunik aktiaatilik aningaasaleeqataassutinik unioqquitsilluni attartornissaminik toqqaasoq.

Inatsisissatut siunnersuut akileraartartumut sukkulluunniit naatsorsuutigereersinnaanngisaanik kinguneqartitsissaaq. Akileraartartoq iluarsiniarluni, inatsisissatut siunnersuummi amerlanerusunik aktiaatilimmut sunniutaasussanik peersiniarluni, iliuuseqarnissaminut periarfissaqassanngilaq. Amerlanerusunik aktiaatilik januaarip qaammataani unioqquitsilluni aktiaatilittut taarsigassarsimasinnaavoq, aammalu inatsisissatut siunnersuutip suli saqqummiunneqannginnerani utertitsilluni akiliuteqareerluni, taamaalilluni akileraartartoq ima inissisimalissalluni marloriaammik akileraartussanngorluni, qulaani nassuiarneqartutut iluarseeriarnissamut periarfissaqarani.

Oqaaseqaat akuersaarniarsarineqarpoq. Siunnersuutigineqarpoq amerlanerusunik aktiaatilinnut aalajangersakkamut tunngatillugu attartortarnermut ulloq 1. februaari 2017-imiit aallartittumik tunniunneqartunut atuutilersinneqassasoq. Isiginiarneqarpoq inatsisissatut siunnersuut 31. januaari 2017-imiit tusarniaassutigineqassasoq. Aamma isiginiarneqarput unioqquitsisumik taarsigassarsiaaareersut pineqarmata, kiisalu atornerluinermik ammaassisoqannginnissaanik pisariaqartitsineq.

Siunnersuutigineqartoq § 76, imm. 2, Deloitte-p annertuutuut isigivaa, aammalu suliassartaanut kiisalu inatsisinut tunngasortaanut arlalitsigut paasitinneqarnissaq pisariaqartillugu.

Malugeqquneqassaaq siunnersuutigineqartoq § 76, imm. 2, allanngortinneqarmat § 76, imm. 4-nngortillugu. Allannguut atortutigut pingaaruteqanngilaq. Allanngortitsineq pissuteqarpoq imm. 2-tut inissiineq iluarsisariaqalernernik arlalinnik pisariaqartitsinermik kinguneqarsimassagaluarmat, inatsimmi arlalitsigut inatsisip atuuttup 76, imm. 2-3-anut innersuussuteqarmat. Aammattaaq aalajangersakkap imarisaa imm. 4-tut inississallugu tulluarnummat, aalajangersakkap sannaq pissutigalugu.

Deloitte isumaqarpoq, allannguat annertuujusoq, taamaalillunilu kiap unerartitsisussaatitaaneramik erseqqissaataanera, oqaaseqaatini taaneqartutut, pineqanngitsoq.

Deloitte-p ajornartorsiutip annertussusia apequserpaa. Deloitte-p siunnersuutigivaa, malittarisassatut siunnersuummut tunngatillugu Akileraartarnermut Aqutsisoqarfik ilitsersuutininik tuluttoortunik, suliffeqarfinnut nunanit allaneersunut atugassanik, suliassasoq. Taanna suliffeqarfiit nunanit allaneersut malittarisassanik eqqortitsinissaannut ikiuutaassaaq.

Deloitte-p ulluinnarni suliffeqarfinnik taakkuninnga sullissinermini misigisimangilaa suliffeqarfiit nunanit allaneersut, sulisussanik attartortitsisartut, suliffeqarfinnut aalajangersimasunik ingerlatsiveqarfiusunut sanilliullugit malittarisassanik paasinninnissaminnik aamma eqqortitsinissaminnik ajornakusoortitsinerusut. Taamaattumik pissusissamisoortutut isigaarput, inissaminiissasoq Akileraartarnermut Aqutsisoqarfiup saqqummiunneqartut kisitsisitigut takussutissanik tunngavilersussagai, pisariaqartitsinerpiavimmut tunngavissaasinnaasumik, aammalu malittarisassanut ukununnga annertuunut taarsiullugu pitsaanerusunik allanik nassaarniarsinnaanissamut qulaajaaviusinnaasumik.

Suliassaqarfiup iluani kisitsisitigut takussutissanik pigisaqartoqannigilaq, aamma suliffeqarfiit nunanit allaneersut akileraarutininik unerartitsisimanginnerisa annertussusiat uppersarniassallugu ajornakusuussaaq. Qanittukkut pisumik assersuutissaqarpoq, sanaartorerup iluani sulisunik attartortitsinermut atatillugu akileraarutininik A-nik unerartitsinnnginnerup kingunerisaanik akileraarutininik akiliisimanginneq aningaasat millioninik amerlassusillit pineqarlutik.

Qaqugukkut sulisumik atukkiussisoqarneranik naliliinermi piunasaqaatit nunani tamalaani, OECD-p suliassaqarfiup iluani isumaqatigiissusiornermut periaasissatut aamma innersuussutai aallaavigalugit, atorineqartut pingaartinneqarput. Aaqqissuussineq Danmarkimi aamma atorineqartoq pineqarpoq.

Erseqqissarneqassaaq sulisussamik attartortitsinermini Kalaallit Nunaanni suliffeqarfimmi atorfinitsitaaneq (atorfinitsitaanermut tunngasut) ilanngunneqannngimmat, imaluunniit suliffeqarfiup nunanit allaneersup kalaallit suliffeqarfiutaannik immikkut suliassaqartitsineranut tunngannngimmat, assersuutigalugu suliffeqarfiup ataani sanaartortutut il.il. Sulisussamik attartortitsinermini ilanngunneqarput inuit suliffeqarfimmit nunanit allaneersumit kalaallit suliffeqarfiutaannut attartortinneqartut, sulisut attartortinneqartut suliassanik kalaallit suliffeqarfiutaasa suliassaasa ilaannik suliqaartinneqartut, aamma kalaallit suliffeqarfiutaata suliassap suliarineqarnissaa il.il. akisussaaffigalugu.

Malittarisassatut siunnersuutigineqartukkut Akileraartarnermut Aqutsisoqarfiup akileraarutininik A-nik il.il. nakkutilliinissamik akisussaaffia kalaallip suliffeqarfiutaanut, sulisussamik attartornissamik isumaqatigiissuteqartumut, nuunneqarpoq, kisiannili

pisinnaatitaaffinnik aamma iliuuserisinnaasanik nuussisoqarani, Akileraartarnermut Aqutsisoqarfiup paasissutissat il.il. tiguneqartut eqqortuunerinik atorsinnaasaasa assinginik.

Kalaallit suliffeqarfiutaata nunanit allaneersumik suliffeqarfimmik isumaqatigiissusiorneq nassuiaasiornermut kisiat atortussarissavaa, kalaallit suliffeqarfiutaata suut pissarsiarissanerai aamma kalaallit suliffeqarfiutaat sutigut nakkutilliisinnaallunilu nakkutilliisuussanersoq pillugu. Taamaattumik paatsuugassaannigilluinnartuussaaq kingusinnerusukkut nakkutilliinermik suliaqartoqassagaluarpat Akileraartarnermut Aqutsisoqarfiup atortussat suut atorsinnaassanerai ilisimassallugu, taamaaliornikkut kalaallit suliffeqarfiutaata nunanit allaneersumik suliffeqarfimmik isumaqatigiissusiornermini tamanna ilanngussinnaaniassammagu. Allattugaat tamakkiisoq taamaattoq inatsisinut ilanngunneqanngippat kalaallit suliffeqarfiutaat pisumut iluarsineqarsinnaanngitsumut inississaaq, Akileraartarnermut Aqutsisoqarfimmut nalunaarutiginnittussaataaneramik eqquutsisisinnaanani, aammalu ilutigitillugu suliffeqarfimmut nunanit allaneersumut tunngatillugu iliuuseqarnissaminut pisussaaffeqarnani.

Aarlerinaat, aammalu taamaalilluni aningaasartuutit tassunga ilaasussat kalaallit suliffeqarfiutaannut tunniunneqartut inatsisissatut siunnersuutip oqaaseqaatitaani ersersinneqanngillat.

Oqaaseqaat ilaannakortumik akuersaarneqarpoq. Siunnersuutigineqarpoq aalajangersakkap atuutilersinneqarnissaa ukiumik ataatsimik 1. januar 2018-i pisussanngorlugu kinguartinneqassasoq. Siunertaavoq inatsisissatut siunnersuummi kinguneqaataasussat kalaallit suliffeqarfiutaasa il.il. suliffeqarfinnut nunanit allaneersunut isumaqatigiissusiornerminnut tunngatillugu ilanngussinissaannik periarfissinneqarnissaat.

Malugeqquneqassarli inatsisissatut siunnersuutip allanngortimmagu sulisussanik attartortitsineq pineqartillugu kina unerartitsisussaataanersoq. Inatsisissatut siunnersuut tunngaviumik ullumikkornit akileraarnerunissamik kinguneqartussaassanngilaq, suliffeqarfik nunanit allaneersoq paasissutissanik pisariaqartinneqartunik tunniussinngitsoorsimanngippat, imaluunniit Kalaallit Nunaannut akileraarutinik A-nik akiliinngitsoorsimanngippat.

Sulisitsisut kalaallit ullumikkut akileraarutinik A-nik sulisorisaminnut unerartitsisussaapput. Pisussaaffik sulisunik attartorneq ilanngullugu ilaneqarmat suliffeqarfiit allaffissornikkut aningaasartuuteqarnerulernerannik kinguneqassaaq. Pisuni amerlanerpaani pineqartoq tassaassaaq suleriaatsit ilisimalluarneqareersut aammalu atorineqareersut, tassami sulisussatut attartorneqartoq akileraartarnermut tunngatillugu nammineq sulisorisatut pineqassammat.

Suliffeqarfiit unerartitsisussaataasut paasissutissat suleqatigisaminnit nunanit allaneersunit pissarsiatik atussavaat, akileraarutinik A-nik unerartitsinissamut nalinginnaasumik

pisariaqartinneqartut. Tamanna aalajangersakkamut immikkut oqaaseqaatini erseqqissarniarneqarsimavoq.

Nunatsinni Advokatit, Grønlandske Advokater (NA)

NA isumaqarpoq siunnersuut § 76, imm. 2 annertuujuusoq, kalaallit suliffeqarfiutaannut annertuumik artukkiisussa, akileraarutininik A-nik unerartitsinissaq siunertaralugu taakku sulisut pineqartut pillugit paasissutissanik pissarsiniartassapata.

NA isumaqarpoq, kalaallit suliffeqarfiutaat akileraarutininik A-nik amigartunik aamma eqqunngitsunik tunngaveqartumik unerartitsinissaat annertuumik aarlerinaateqassasoq. Naammaginangilaq pisumi taamaattumi kalaallit suliffeqarfiutaasa paasissutissat suleqatigisaminnit pissarsiamik eqqortuunngeratarsinnaaneritut aamma tamakkiisuunngeratarsinnaaneritut aarlerinaat tigussappassuk.

NA isumaqarpoq, siunnersuut akileraartarnermut oqartussaasut oqartussaasut suliassaannik kalaallit suliffeqarfiutaannut inissiinerannik takussutissaasoq, kalaallilli suliffeqarfiutaat akileraarutininik A-nik unerartitsinissamut malittarisassanik atuutsitsinissamik atortussanik pisariaqartinneqartunik aamma pisinnaatitaaffinnik pigisaqaratik, imaluunniit paasissutissat eqqortuunerinik nakkutilliisinnaanatik.

Deloitte-p pineqartoq pillugu tusarniaanermi akissutaanut oqaaseqaatit innersuussutigineqarput.

NA-p oqariartuutigaa, kalaallit suliffeqarfiutaasa pisunik malittarisassaliussisinnaaneranut periarfissaq tassatuaasoq suliffeqarfimmik nunanit allaneersumik isumaqatigiissut aqutugalugu. Pisumi suliffeqarfiup nunanit allaneersup paasissutissanik tunniussinissamik isumaqatigiissummik eqqortitsinnginnerani ”kingunerisassa” naggataatigut tassaassaaq suleqatigiinnermik unitsitsineq, tamannalu kalaallit suliffeqarfiutaanit piumaneqarnaviangilaq, sulisussanik amigaateqarneq pissutigalugu. Tamatuma saniatigut kalaallit suliffeqarfiutaat akileraarutininik A-nik akiliisussanngortitaassaaq, taamaalillunilu aamma paasissutissanik pisariaqartinneqartunik pissarsiniarnissamik aamma paasissutissat taakku eqqortuunerannik suliassamik tiguisariaqalersinnaallutik. Tamanna naammaginangilaq.

NA isumaqarpoq, Akileraartarnermut oqartussaqaqarfiup suliffeqarfinnut nunanit allaneersunut tunngatillugu unerartitsisussaataitanermik malittarisassat atortinneqarnissaat ajornakusoortikkaluarpaguluunniit tamanna kalaallit suliffeqarfiinut, suliffeqarfinnik nunanit allaneersunik suleqateqartunut, aningaasatigut artukkiinissamut tunngavilersugaalluannngitsuusoq. Pisumi taamaattumi Akileraartarnermut oqartussaqaqarfik akileraartarnermut inatsit malillugu pisinnaatitaaffitik atorlugit malittarisassat eqqortinneqarnissaat qulakkeerniartariaqarpaat, aammalu tamatumunnga atatillugu kalaallit

suliffeqarfiutaat paasissutissanik tapersiuteqassappata taava tamanna sulisunik attartortitsinermut atatillugu suleqatigisamik attaveqarfigineqarsinnaasut paasissutissartaannut killilerneqartariaqarpoq, taamaaliornikkut Akileraartarnermut oqartussaasut suliffeqarfiit nunanit allaneersut kinaassusersisinnaaniassammatigit.

Malugeqquneqassaaq, siunnersuut saqqummiunneqanngimmat malittarisassat atuuttut atuutitinneqarnissaat akileraartarnermut oqartussaqaarfimmit ajornakusoortinneqarnera pissutigalugu, kisiannili pissutigalugu malittarisassat maanna atuuttut suliffeqarfiit nunanit allaneersut Kalaallit Nunaanni unerartitsisussaataitanerminnik eqqortitsinninnissaasa peratarsinnaanerat pisinnaammat, aamma assersuutigalugu akileraarutininik A-nik Kalaallit Nunanni unerartitsinatillu akiliinngitsoorsinnaanerat. Pisoq taamaattoq inuiaqatigiinnut nalinginnaasumik akuersarneqarsinnaanngitsutut isigisariaqarpoq, aammali pingaarnertut kalaallit suliffeqarfiutaannut unammillertunut aamma sulisartunut kalaallinut, unammilleqatigiinnikkut atugassarititaasut assigiinnginnerat pissutigalugu piumaneqanngeratarsinnaasut. Nunani allani suliaasaqaarfimmi tamatumani malittarisassanik sukaterineq pingaartillugu aallunneqarnikuuvoq, ernummatigineqartorujussuunikuummat sulisartunik atukkiussisarnerup akikinnerusumik akissaasersuinermik kinguneqarsinnaanera.

NA allannguutissatut siunnersuutitut allanut tunngatillugu allanik oqaaseqaatissaqanngilaq.

Sulisitsisut (GE)

Siunnersuutigineqartumi § 76, imm. 2 GE-mit attanneqarsinnaanngitsutut isumaqaarfigineqarpoq, kalaallit suliffeqarfiutaata suliffeqarfimmut nunanit allameersumut niuernikkut atassuteqarnermini ajornerpaamik pisoqarnerani suliffeqarfiup nunanit allaneersup akileraarutinit A-nut unerartitassai tamakkerlugit akiliuteqarnissaminik neriorsuitinneqarnissaa, uppersarsarneqarsinnaapput akissarsiasanik qanoq amerlatigisut sulisorisamut tuttussaansut uppersarsarneqarsinnaapput, tak. aalajangersakkamut oqaaseqaatit.

Oqaaseqaat ilanngunneqanngilaq. Inatsisikkut kalaallit suliffeqarfiutaat sulisussanik attartorsimasoq unerartitsisussaataassaaq. Sulisussat attartorneqartut akissarsiaasa qanoq amerlatiginerat suliffeqarfimmit ilisimaneqanngitsillugu akissarsiat tamakkerlugit tunngavigineqartariaqarput, paasissutissanik allanik pigisaqartoqanngimmat. Suliffeqarfilli akissarsiat il.il. tunniunneqartut uppersarsarnerisigut A-nik akileraarutissaviit kisiisa unerartillugillu akiliutigisinnaavai.

Aalajangersakkap imm. 2-ani pisussaataitannginneq kalaallit oqartussaqaarfiisa akileraarutininik A-nik unerartitsinissamik illugiilluni isumaqatigiissuteqarnerannik ilutigitillugu tunngavilersuuteqartoqarpat, tunngavilersuut taanna GE-p naliliinera naapertorlugu kukkusuuvoq, imaluunniit imminut assortorluni.

Kalaallit Nunaat ullumikkut unerartitsinissamik taamaattumik Danmarkimik illugiilluni isumaqatigiissuteqarpoq, nunanilli allanik isumaqatigiissuteqarani. Aalajangersagassatut siunnersuummi malittarisassaq pingaarneq sumi illugiilluni pisussaaffimmik taamaattumik isumaqatigiissuteqartoqannginneranut tunngavoq.

GE isumaqarpoq, kalaallit suliffeqarfiutaata suliffeqarfimmik nunanit allameersumik isumaqatigiissuteqarnerminik kalaallit akileraartarnikkut oqartussaasuinut ilisimatitsimatillugu, taava isumalluutininut aamma niuernermit eqqarsaatigalugit kalaallit suliffeqarfiutaasa unerartitsinissamik pisussaaffilernissaat tunngavissaqanngitsoq.

Kalaallit suliffeqarfiutaat sulisussanik attartorneq pillugu isumaqatigiissuteqarnerminnik akileraartarnermut oqartussaarfimmik nalunaarutiginnissallutik ullumikkut pisussaaffeqanngillat. Aaqqiissut taamaattoq aammattaaq unammilligassanik, unerartitsisussaataitaanermik, nalunaarutiginnittussaataitaanermik aamma sulisorisat attartukkat akileraarutissaannik A-nik akiliuteqarnermut ullumikkut qulakkeerinneqataasunut aaqqiissutaassanngilaq.

GE-p uparuarpaq, sulisussanik attartornermut isumaqatigiissutit imarisaat assigiinngissinnaammata, aamma isumaqatigiissutit sulisussamut attartorneqartumut akissarsiaritinneqartussat suliffeqarfiup nunanit allaneersup aamma sulisussatut attartorneqartup akornanni isumaqatigiissutigineqartarmata, suliffeqarfik nunanit allaneersaq taannaassaaq unerartitsisussaataasusaaq.

Suliffiup iluani isumaqatigiissut taamaattoq pillugu suliffeqarfiup nunanit allaneersup kalaallit suliffeqarfiutaannut ilisimatitsissutigissallugu pisussaaffeqanngilaq.

Oqaaseqaatit allangortitsinissamik pissutissaqalersitsinngillat. Inatsisissatut siunnersuummi aalajangersagassatut siunnersuummi kalaallit suliffeqarfiutaata paasisutissat taamaattut isumaqatigiissuteqarfiusumit pissarsiarinissaat pisariaqartissavaa, sulisussatut attartorneqartunut akileraarutininik A-nik unerartitsinissaq suliarisinnaajumallugu.

Pisuni taamaattorpiani, ”aaqqiissummik atorluarsinnaasumik, nunat akunnermini namminneq sinnerlutik isertitanik A-nik unerartitsisinnaanerannik” pisinnaatitaannginnermi taaneqartup assinganik aaqqiissutissaqannginneranik amigaateqarneq tunngavissaqarpoq, suliffeqarfik nunanit allaneersaq tassaassasoq unerartitsisusussaq – tamanna ingasagisassaannigitsutut naammaginartutullu isigalugu.

Tamatumunnga akisussaaffik kalaallip suliffeqarfiutaanut tunniunneqassanngilaq.

Malugeqquneeqaqqissaaq, Kalaallit Nunaat taamaallaat Danmarkimik illugiilluni akileraarutininik A-nik unerartitsinissamik isumaqatigiissuteqarmat. Pisuni arlalinni takuneqartarpoq sulisussanik attartortitanik Danmarkip saniatigut nunanit allaneersunik

atuisarneq. Tamanna inatsimmik sukaterinissamik pisariaqalersitsivoq, akileraarutininik A-nik akiliinngitsoortoqarsinnaanera annikinnerulersinniarlugu.

Aalajangersakkanut ataasiakkaanut oqaaseqaatit

§ 1-imut

Nr. 1-imut

Siunnersuutaavoq aktiateqarluni aamma piginneqataassuseqarluni ingerlatseqatigiiffiit Kalaallit Nunaanni aqutsisoqarpata, imaluunniit ingerlatseqatigiiffik Kalaallit Nunaanniittutut nalunaarsorneqarsimappat Kalaallit Nunaanniittutut isigineqassasut.

Nunami maani aqutsisoqarneranik aalajangiineq ingerlatseqatigiiffimmi aalajangiisarnernut atatillugu pissusiviusunik naliliinermik tunngaveqassaaq. Ingerlatseqatigiiffimmik ulluinnarni aqutsisut pillugit aalajangiinerit naliliinermi tassani pingaarnerpaatinneqassapput.

Taamaammat ingerlatseqatigiiffik nunami maani pisortatigut aqutsisoqaruni, ingerlatseqatigiiffiulluunniit aqunneqarfia pingaarneq maaniippat Kalaallit Nunaanniittutut isigineqarnerusassaaq.

Siulersuisut ingerlatseqatigiiffiup ulluinnarni aqutsisorippagit, taava siulersuisut sumiiffiat ingerlatseqatigiiffiup Kalaallit Nunaanniittuuneranik naliliinissami pingaaruteqarluinnassaaq.

Aalajangiinerit ataatsimeersuarnerni aalajangiinerusartut ingerlatseqatigiiffiup Kalaallit Nunaanniittutut nalilerneqarsinnaaneranut aalajangiisuunngillat. Taamaammat aktiateqarnerinnaq naliliinermi aalajangiisuunaviannigilaq. Aktiaatilik ingerlatseqatigiiffimmik aqutsisuiuppat, taava nuna aktiaatillip najugaa ingerlatseqatigiiffiup nunami maani aqutsisoqarneranik naliliinissami ilanngunneqarsinnaavoq.

Nr. 2-mut

Siunnersuutaavoq § 1, imm. 4-kkut erseqqissarneqassasoq inuit Namminersorlutik Oqartussanit naalagaaffiup avatani sulisussatut il.il. aallartinneqartut tamakkiisumik akileraartussaataasut. Aalajangersakkap siunertaa pingaarneq tassaavoq inuit, Wienimi isumaqatigiissut nunalluunniit tamat isumaqatigiissutaat allat naapertorlugit nunami najorallakkaminni akileraarutinik akiliisussaataaangitsut akileraartinneqarnissaannik qulakkeerinissaaq. Aalajangersakkami pineqarput Namminersorlutik Oqartussanit, nunatsinni kommuninit aamma suliffeqarfinit il.il. aallartinneqartut. Aalajangersagaq malillugu akileraartussaataajumalluni pingaaruteqarpoq inuk suliffeqarfimmit aalajangersakkami ilanngunneqartumit aallartitaanissaat, aammattaaq aallartitat nunami aallartitatut suliffigisaminni akileraartussaataaanginnissaat.

Aallartitat assersuutigalugu tassaapput naalagaaffiup aallartitai. Aammattaaq allaffissornikkut teknikkikkullu sulisorisat il.il., aallartitaqarfimmut attuumassuteqartut ilaatinneqarsinnaapput.

Aamma akileraartussaataapput aappaasut aamma meeqqat 18-it inorlugit ukiullit aallaqataasut. Inuilli taakku naalagaaffimmut takornartamut akileraartussaataagunik tamakkiisumik akileraartussaataassanngillat. Aappaasut meeqqallu aallaqataasut Wienimi isumaqatigiissut naapertorlugu nunami allartinneqarfimminni tunngaviusumik akileraartussaataassanngillat.

Inuit danskisut innuttaassuseqartut, piffissamilu atorfinitsitaaffimminni nunami allami najugaqareersut, aammalu soorlu nunami najukkaminni Kalaallit Nunaata sinniisoqarfiani atorfinittut aalajangersagaq naapertorlugu akileraartussaataalissanngillat, pineqartut nalinginnaasumik nunami najugaqarfimminni akileraartussaataariissammata.

Nr. 3-mut

Siunnersuutaavoq § 2, imm. 1, nr. 15-ip oqaasertaa erseqqissarlugu aalajangerneqassasoq pigisamik aalaakkaasumik tunisaqarnikkut isertitat pigisamit aalaakkaasumit isertitanut ilaassasut.

Nr. 4-mut

§ 3, imm. 1, nr. 9-tut siunnersuutigineqartup siunertaraa Kalaallit Nunaata atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiuteqartoqartillugu ikiuinissaq pillugu isumaqatigiissut naapertorlugu pisussaaffiisa akileraartarnermi inatsisinut ilanngunneqarnissaat.

Inuit naalagaaffimmit isumaqatigiissuteqaqataasumit Kalaallit Nunaannut ikiuukkiartortillugit aallartitaasut aalajangersakkatut siunnersuutigineqartoq naapertorlugu akileraartinneqassanngillat. Kisianni inuup inatsimmi § 1, imm. 1, nr. 1-2 naapertorlugit Kalaallit Nunaannut tamakkiisumik akileraartussaataareeruni, Kalaallit Nunaannut akileraartussaataanini attatiinnassavaa.

Nr. 5-imut

§ 16 a-kkut siunnersuutaavoq aktianik amerlanernik peqartut il.il. ingerlatseqatigiiffiutiminnit taarsigassarsisinneqartut, qularnaveeqqusiiffigineqartut imaluunniit akiliunneqartut il.il. akileraartinneqassasut. Tamanna pissaaq akileraartarnermi inatsisini maleruagassat nalinginnaasut malillugit akissarsiatut iluanaarutisiatulluunniit akileraarusiinikkut. Kisianni aktiaatilik il.il. § 16 a naapertorlugu akileraartinneqassappat, aktiaatilik il.il. aamma ingerlatseqatigiiffik taarsigassarsisitsisoq, § 86, imm. 3-mi, aalajangiisuusutut oqartussaannermut tunngasumi pineqartoq imminnut attuumassuteqassapput. Siunnersuutip kingunerissavaa aktiaatillip taarsigassarsiaasa piffissami tunniunneqarfimminni akileraaruserneqareernissaat.

Taarsigassarsisoq aktiaatillip aalajangiisuusutut oqartussaasup, aningaasarsianit akileraarutit pillugit inatsimmi § 86, imm. 3-mut innersuussineq naapertorlugu qanitarippagu – soorlu

aapparippagu – taava siunnersuut naapertorlugu taamatulli akileraartitsisoqassaaq, tassa taarsigassarsisoq ingerlatseqatigiiffimmit aningaasanik utertinneqartussaannngitsunik tunineqartutut isigalugu. Qanigisaasoq nammineerluni aktiaateqanngippat il.il. akileraarusiineq § 16 a naapertorlugu pisinnaavoq, taarsigassarsisitsineq aktianik amerlanernik peqartup peqqusineratigut pisimappat, ingerlatseqatigiiffiummi taarsigassarsisitsinera aktianik amerlanernik peqartup aningaasaqarneranik sunniisimasutut isigineqassamat.

Aningaasat tunniunneqartut akissarsiatut iluanaarutisiatulluunniit akileraaruserneqassanersut akileraartarnermi inatsisit nalinginnaasut naapertorlugit aalajangerneqassaaq. Aktiaatilik il.il. sulisorineqarpat aningaasat tiguneqarsimasut aktiaatillip il.il. nammineerluni sulinermini akissarsiassaanut naapertuunnersut nalilerneqassaaq. Taamaanngippat aningaasat tiguneqarsimasut iluanaarutisiatut isigineqassapput. Immikkoortinneralli pingaaruteqarujussuanngilaq, akissarsiammi iluanaarutisiallu tiguisumut assigiimmik akileraaruserneqartarmata. Akissarsiat iluanaarutisiallu ingerlatseqatigiiffiup aningaasartuutigai ilanngaatigineqarsinnaasut.

Taarsigassarsiat § 16 a-mi aalajangersakkatut siunnersuummi pineqartunut ilaappata akileraartarnermut tunngasutigut tamatigut tunngavigineqassaaq tamanna taarsigassarsisitsisumit taarsigassarsisumilluunniit taarsigassarsinertut isigineqanngitsoq. Tassa imaappoq taarsigassarsisup ernianut aningaasartuutit aningaasarsiaminit akileraaruteqaataasussanit ilanngaatigisinnaassanngilai.

Aamma taarsigassarsiat ingerlatseqatigiiffimmut utertinneqartussaannngitsutut tigusatut isigineqarnerisa kingunerissavaa, akileraarutininik A-nik imaluunniit iluanaarutisianit akileraarutininik unerartitsinissaq pillugu maleruagassat atuuttut, aamma akissarsianik iluanaarutisianillu tunniussineq il.il. pillugit Akileraaruseriffimmut nalunaaruteqarnissaq pillugu maleruagassat malinneqarnissaat.

Naak aktiaatillip unioqqutitsilluni taarsigassarsiai inatsisit nalinginnaasut malillugit utertinneqartussaagaluartut, unioqqutitsilluni taarsigassarsianik utertitsisoqarpat taarsigassarsiat aktiaatillimmut akileraaruteqaataasimanerat suliareqqinneqassanngilaq. Tamatuma akissarsiat iluanaarutisialluunniit akileraaruserneqarnerannik atorunnaarsitsisoqarsinnaannginnera assigaa. Assinganik tunngaviusumik akileraarusiinissamik nutaamik pilersitsissanngilaq, pingaarnertut aktiaatilik § 16 a naapertorlugu taarsigassarsiaminik akileraarutinut akiliisitaasimappat, kingorna suliffeqarfiup taarsigassarsiat isumakkeerinnissutigisimappagit imaluunniit suliffeqarfiup amerlanerusunik aktiaalimmut pissarsiassat utertippagit.

Allatut aalajangiisoqarnissaa akileraaruserinermik ingerlatsineq pillugu Inatsisartut inatsisaanni § 50 naapertorlugu pisinnaavoq, aalajangersakkami piunasaqaataasut eqquutsinneqarpata. Inuinnartut iliuuserisimasat kingusinnerusukkut allannortillugit aningaasarsianit akileraarutininik angissusiliinermut sunniutilimmik aalajangiiffigineqarnissaat aalajangersakkap periarfissippaa.

Aalajangersakkami pineqanngillat ingerlatseqatigiiffinit taarsigassarsiat niuernermi nalinginnaasumik atugassarititaasut malillugit taarsigassarsiaritinnegartut. Taarsigassarsiat soorlu akiliussigallarnermut kontomi nalunaarsorneqarsimanertik pissutiginnarlugu nalinginnaasuunngillat. Taarsigassarsiat ataasiakkaat tamarmik immikkut naliliiffigineqassapput. Taarsigassarsiat piffissap sivikitsup iluani, soorlu qaammatini 3-6-ini akilerneqarnerat, kiisalu taarsigassarsinermut pisussaasut, soorlu sulinerneq atattillugu angalanermut atattillugu akiliussineq imaluunniit nioqqutissanik pisinermut atattillugu il.il. pineqarpata ilaatigut tamakku. Taarsigassarsiat taarsiissuteqanngitsut, t.i. taarsigassarsiat il.il., taamaallaat § 16 a naapertorlugu akileraaruserneqassanngillat, aningaaserivimmit nalinginnaasumik taarsigassarsiaasimappata imaluunniit piginneqataassuseqarluni imaluunniit aktiaateqarluni ingerlatseqatigiiffiit pillugit inatsimmut naapertuuttumik taarsigassarsiarineqarsimappata.

Siunnersuummittaag pineqanngillat aningaaserivinnit taarsigassarsiat. Taamaalluni aktiaatilik aningaaserivimmi aktiaateqarnermigut aalajangiisuusumik inissisimasoq aalajangersakkamut ilaatinneqarnani aningaaserivimmi tassani nalinginnaasumik taarsigassarsisinnaavoq.

Kiisalu aalajangersakkami pineqanngillat aktianik amerlanernik peqartut il.il. unioqqutitsinerunngitsumik taarsigassarsiaat, Aktiateqarluni ingerlatseqatigiiffiit pillugit inatsisip Kalaallit Nunaannut atuuttussanngortinneqarnera pillugu peqqussut aamma Piginneqataassuseqarluni ingerlatseqatigiiffiit pillugit inatsisip Kalaallit Nunaannut atuuttussanngortinneqarnera pillugu peqqussut naapertorlugit periarfissarineqartut.

§ 16 a, imm. 2-mut

Aalajangersagaq marloriaammik akileraartinneqarnissap pinngitsoortinnissaanik siunertaqarpoq, taamaassagaluarmanmi taarsigassarsiat § 16 a-mi siunnersuutigineqartutuut akileraaruserneqartut utertillugit akilerneqarpata. Taamaattoqartillugu taarsigassarsianik utertitsineq akileraartarneq eqqarsaatigalugu ingerlatseqatigiiffimmut tapiissutitut isigineqassaaq.

Taamaammat imm. 2-mi aalajangersarneqarpoq taarsigassarsiat imm. 1 naapertorlugu akileraaruserneqartut suliffeqarfiup taarsigassarsisumit isertitaasut isigalugit akileraaruserneqassanngitsut.

Nr. 6-imut

Aalajangersagaq soraarnerussutisiaqarnissamut aaqqissuussinermik maanaannaq atorunnaarsitsinermi akileraarusisarnermut tunngasuvoq.

§ 46, imm. 7-ikkut siunnersuutaavoq maanaannaq atorunnaarsitsinermi, soraarnerussutisiaqarnissamut inuunermulluunniit sillimmasiinermik aaqqissuussinermut imaluunniit soraarnerussutisiaqarnissaq siunertarlugu ileqqaakkanut piffissami qaammatinit 23-nit siviuserusumi akiliuteqartoqarsimannigippat akileraarummik akiliisitsisoqassanngitsooq. Piumasa-

qaataavorli aqqissuussinerup ileqqaakkalluunniit piffissami atorunnaarsitsiviusumi nalinga 10.000 kr.-init minnerussasoq. Aningaasanik taakkuninnga tunniussinerit tiguisussamut akileraaruteqaataassapput, akileraarutinillu A-nik unerartitsiffigineqassallutik.

Nr. 7-imut

§ 69 a-kkut siunnersuutaavoq unioqutitsiniartoqarsinnaanera akiorniarlugu maleruagassamik nunat tamat atugaannik, akileraaruseriffiup atorsinnaasaanik atuutilersitsisoqassasoq.

Akileraartussaataitasut marloriaammik akileraarnissaq pinngitsoorniarlugu isumaqatigiissummik iluaqutiginninnissaraluaq atorunnaassaaq, pissutsit pisullu soqutiginaatillit tamaasa eqqarsaatigalugit aalajangerneqarsinnaasorinarpat iluaqutiginninniarnaq, aqqissuussinerni suniluunniit imaluunniit nuussinerni suniluunniit toqqaannartumik toqqaannangitsumilluunniit iluaqutiginninnermik kinguneqartoq siunertat pingaarnert ilagigaat, aatsaalli pisut taakku apeqqutaatillugit iluaqutiginninnissamik akuerineqarnissap, isumaqatigiissummi aalajangersakkap pineqartup imarisaanut siunertaanullu naapertuuttuunera uppersarsarneqangippat.

Pissutsit pisullu soqutiginaatillit tamaasa eqqarsaatigalugit iluaqutiginninniarnep, aqqissuussinerni suniluunniit imaluunniit nuussinerni suniluunniit toqqaannartumik toqqaannangitsumilluunniit iluaqutiginninnermik kinguneqartup siunertanut pingaarnertut ilaasimanerata aalajangerneqarnissaa akileraaruseriffiup isumagisassaraa. Taamaassorineqarpat iluaqutiginninnissamik akuerineqarnissap, isumaqatigiissummi aalajangersakkap pineqartup imarisaanut siunertaanullu naapertuuttuunerata uppersarsarneqarnissaa akileraartussaataitasup isumagisassaraa.

”Iluaqutiginninnerit” taaneqartut tassaapput isumaqatigiissut naapertorlugu iluaqutissat, soorlu akileraarutinik akiliisussaataannginneq, akileraarutinik akiliinissamik kinguartitsinissaq imaluunniit ajunngitsorsiat allat.

Oqaatsit ”aqqissuussinerni suniluunniit imaluunniit nuussinerni suniluunniit” assigiinngitsorpassuarnut sammitinneqassaaq, pineqarpullu isumaqatigiissutit, paaseqatigiissutit, aqqissuussinerit, nuussineq qasseeriarluniluunniit nuussinerit, apeqqutaatinnagu taakku tunngavissaqartinneqarnersut tunngavissaqartinneqanginnerisulluunniit. Pingaartumik pineqarput aningaasarsianik, pigisanik aningaasarsiaqarnissamulluunniit piginnaatitaanermik pilersitsinerit, tunniussinerit, pissarsinerit nuussinerilluunniit suulluunniit. Oqaatsinissaaq pineqarput aallartitsinissamik piginnaangorsarnissamillu aqqissuussinerit.

Aqqissuussinerup imaluunniit nuussinerup isumaqatigiissummik iluaqutiginninniarnermut atorneqarsimaneranik naliliinissami pissutsit pisullu soqutiginaatillit tamaasa akileraartarnermi oqartussaasut ataatsimut eqqarsaatigissalugit isumagisassaraat. Nuussinerup isumaqatigiissummik iluaqutiginninniarnermut pingaarnertut siunertaasimaneranik naliliinissami ilaatigut pingaartillugu isiginiarneqassaaq nuussineq imaluunniit aqqissuussineq aningaasarsiornermik siunertaqavilluni pisimansoq.

Unioqutitsiniartoqarsinnaanera akiorniarlugu maleruagassaq marloriaammik akileraannginnissamik isumaqatigiissutinut atuuppoq, apeqqutaatinnagu isumaqatigiissutit qanga atortuulersinneqarsimanersut, tassa imaappoq aamma isumaqatigiissutinut atuutereersunut.

Nr. 8-mut

Aalajangersakkatut siunnersuutip kingunerissavaa soraarnerussutisiaqarnissamut aqqissuusinnit inuunermulluunniit sillimmasiissutinut aningaasartakitsunit, § 46, imm. 7-itut siunnersuutaasoq naapertorlugu maanaannaq tunniunneqartut pissarsisumut aningaasarsiatut A-tut isigineqarnissaat. Aalajangersagaq § 46, imm. 7 naapertorlugu tunniunneqartut taakku maanaannaq atorunnaarsinneqarneranni, § 46, imm. 1-2 naapertorlugit akileraaruserneqartussaanginnerannut attuumassuteqarpoq.

Nr. 9-mut

Allannguutissatut siunnersuutaasoq naqqiissutaavoq, siunnersuutigineqartup § 76, imm. 4-p kingunerisaanik massakkumut § 76, imm. 4-raasoq imm.5-nngortinneqarluni.

Nr. 10-mut

§ 76, imm. 4-tut siunnersuutaasumi aalajangersarneqarpoq sulisunik nunanit allaneersunik atukkinneqarnermi kikkut unerartitsisussaataitanersut. Sulisunik atukkiussisoq Kalaallit Nunaanni angerlarsimaffeqanngippat aalajangersimasumilluunniit ingerlatsiveqanngippat sulisunik atukkinneqarnissamik isumaqatigiissuteqarnermi akileraarutininik A-nik unerartitsisussaq tassaavoq suliffeqarfik Kalaallit Nunaanni angerlarsimaffeqartoq aalajangersimasumilluunniit ingerlatsiveqartoq.

Sulisunik atukkiussineq pillugu maleruagassat naapertorlugit akileraarusiinissami piumasaqaataavoq sulinerup Kalaallit Nunaanni pisimanissaa.

Sulisunik atukkiussineq pillugu maleruagassaq suliaqarfinnut tamanut atuuppoq. Aalajangersagaq ilaatigut suliffeqarfissuup ataatsip iluani sulisunik atukkiussinermi atorneqarsinnaavoq.

Aalajangersagaq atuutissanngilaq sulisitsisoq nunamit allameersoq sulisussanik atukkiussisoq nunami maani aalajangersimasumik ingerlatsiveqarpat.

Aalajangersagaq atuutissanngilaq suliffeqarfik nunatsinneersoq, nunani allani suliffeqarfimmik inummit ataatsimit pigineqartumik ataatsimik arlaqartunilluunniit suliaqartitsippat, taamaattoqartillugumi sulisoq tassaanngimmat sulisitsisoq nunamit allameersoq. Taamaattoqartillugu sulisoq atorfeqartitaalluni imaluunniit namminersorluni inuussutissarsiummik ingerlataqartumi, immaqalu Kalaallit Nunaanni aalajangersimasumik ingerlatsiveqartumi akissarsior-tutut sulisuusinnaavoq.

Sulisunik atukkiussinermik naliliineq

Sulisunik aalajangersagaq naapertorlugu atukkiussineruneranik aalajangiinissaq akileraartarnermi periaatsit malillugit pissaaq, matumani aamma eqqarsaatigineqassalluni sullissinerit suliffeqarfimmut Kalaallit Nunaanneersumut sullississutigineqartut kimerpiaq sulisitsisuuffigineqarnersut.

Sulisup pineqartup suliffeqarfimmi Kalaallit Nunaanneersumi akissarsiortutut sulisuuneranik imaluunniit suliffeqarfik namminersortoq nunami allameersaq sinnerlugu suliamik suliaqarneranik naliliineq aalajangiisuussaaq. Suliffeqarfik nunamit allameersaq nammineq akilikka-minik akisussaaffigisaminillu suliffeqarfimmut Kalaallit Nunaanniittumut sullissippat taman-na sulisunik atukkiussinertut isigineqassanngilaq.

Sulisunik atukkiussinerussaaq inuk suliffeqarfimmi maaniittumi suliassamik suliaqarnissamut atukkiunneqarsimalluni sulinermigut akissarsiassaminik aningaasarsiaqarpat, suliassaq kalaallit suliffeqarfiutaata ingerlataata/suliaqarfiata *ilagippagu*, suliffeqarfiulluunniit ingerlataanit sukkulluunniit *avissaartinneqanngippat*.

Sulisoq nunamit allameersaq sulisunik atukkiussisarneq pillugu aalajangersakkami pineqartunut ilaassanngilaq suliaq;

a) suliffeqarfiup ingerlataanut ilaanngippat, imaluunniit

b) inuussutissarsiutigalugu suliffeqarfimmut namminersortumut nunami allameersumut avissaartinneqarsimappat.

a)-mut Suliaq ingerlatamut ilaassaaq suliap suliffeqarfiup nunamit allameersup sulisuinit suliarineqartup suunerata kalaallit suliffeqarfiutaata ingerlataa/suliaa pingaarnertigut assigippagu. Kalaallit sanaartormik suliffeqarfiutaat illuliortiterluni inuussutissarsiummik ingerlatsisoq sanaartukkamini betonimik sanasulluunniit suliassaannik sanaartortitsippat, sullissinerit taakku sanaartormik suliffeqarfiup niuernermini ingerlataanut ilaasutut, taamaalillutillu aamma sulisunik atukkiussinertut isigineqassapput. Kalaallit suliffeqarfiutaat suliap naammassillugu suliarineqarnerani akisussaasuussanersaq aningaasatigullu akiliisussaassanersaq naliliinissami paasilluarsimassallugu pingaartuuvoq.

b)-mut Suliap suliffeqarfiit arlaanni sumi ilaanera akileraartarnermi inatsisit naapertorlugit nalilerneqartariaqarpoq. Suliap suliffeqarfimmi nunami allameersumi sulisuusunit isumagineqartup suunera, suliffeqarfiullu nunami allameersup sullissinerata kalaallit suliffeqarfiutaannit qanoq immikkoortiginera matumani isiginiarneqartariaqarpoq. Aammattaaq isiginiarneqartariaqarpoq suliambut naammassineqartumut tunngatillugu akisussaaffik annerpaaq aningaasatigullu akiliisussaaneq kimit nammanneqarnerisq. Taakku tassaasinnaapput suliambut atatillugu qularnaveeqqusiinerit kinguaattoortoqartilluguluunniit ullormut akiliisitsinerit. Kiisalu aalajangiisuulluinnartinneqassaaq kalaallit suliffeqarfiutaata sullissinerit isumagineqarnerat toqqaannartumik toqqaannanngitsumilluunniit nakkutilliisuuffiginerai, aqunnerai misissugarine-raaluunniit.

Pissusiviusut sulisunik atukkiussineruneranik naliliinissami akileraartarnikkut periuserineqartut malillugit isiginiarneqassapput, imaangitsoq naatsorsuutigisat isumaqatigiissusianiittut il.il. Tassa imaappoq, isumaqatigiissummik sulisitsisup nunami allamiup namminersorluni inuussutissarsiummik ingerlataqartuunissamik piumasaaqatinik naammassinninneranik imaqartumik atsiuisimaneq naammangilaq.

Sulisunik atukkiussinermi unerartitsisussaatitaaneq

Kalaallit suliffeqarfiutaat sulisunik Kalaallit Nunaannut akileraartussaatitaasunik akissarsitsinermini akileraarutininik A-nik unerartitsinissamut aalajangersagaq naapertorlugu pisussavoq, soorlu § 2, imm. 1, nr. 1 naapertorlugu killilimmik akileraartussaatitaasunik.

Suliffeqarfik il.il., sulisussamik attartortoq akileraaruserineq pillugu inatsisartut inatsisaanni § 30, imm. 1, nr. 1-6 malillugu paasissutissanik isumaqatigiissusiorfigisaminit nunanit allaneersumit pissarsiniassaaq, kalaallit suliffeqarfiutaata akileraarutininik A-nik unerartitsinissaa, nalunaarutiginninnissaa aamma akiliuteqarnissaa siunertaralugu.

Suliffeqarfiup akileraarusigassanik naatsorsuinissamini paasiniagassaraa, atukkiussisumut akiliutissat ilaat qanoq amerlatigisut sulisup atukkiunneqartup akissarsiasarissanerai. Aningaasarsianik naatsorsuineq, matumani aamma ilanngaattissanik, akeqanngitsumik ajunngitsorsianik akileraarusiinissaq il.il. aningaasarsianit akileraarutit pillugit inatsimmi killilimmik akileraartussaatitaasunut maleruagassat nalinginnaasut malillugit pissaaq.

Aalajangersakkap imm. 3-a malillugu unerartitsisussaatitaasup pisariaqartitsineq naapertorlugu akissarsiassaq qanoq angitigisoq sulisorineqartumut akissarsissutigittinneqassanersoq uppersarsinnaanngippagu tunngaviusussaq tassaassaaq akissarsiassaq tamakkerlugu (akiligassiissutip katinnera tamakkerlugu) akileraarutininut A-nut akiligassatut unerartinneqassasoq.

Unerartitsisussaatitaasup akiliutissat ilaasa qanoq amerlatigisut sulisup akissarsiassaatut isigineqartussat naammattumik uppersarsaatissaqartinnngippagit, akiliutissat tamarmiusut akileraarutininik A-nik unerartitsiffigineqassapput.

Inunnut aatsitassalerinerup aamma illoqarfiit nunaqarfillu pioreersut avataanni pilersarusiornerit sanaartornerillu ilaasa iluanni sulisunut tunngatillugu tamakkiisumik akileraarutissat suliffeqarfiup, inatsimmi § 72 a aamma § 72 b naapertorlugit unerartissavai.

Aalajangersakkami oqaaseqatigiit sisamaanni, sulisunik atukkiussineq pillugu maleruagassami immikkut pineqartoq aalajangersarneqarpoq, tassa sulisunik atukkiussisoq nunami allameersoq nunami, Kalaallit Nunaata akileraarutininik A-nik unerartitsisarneq pillugu ikioqatigiinnissamik isumaqatigiissuteqarfigisaani angerlarsimaffeqarpat.

Immikkut pinninnermut pissutaaneruvoq Danmarkip aamma Kalaallit Nunaata aaqjissuussinermik pitsaasumik peqareernerat, tassa nunat akileraarutininik A-nik imminnut

sinnerlutik unerartitsisarlutik. Tassa inatsit aaqqissuussinermik taassuminnga allanngortitsinissamik siunertaqanngilaq.

§ 76, imm. 4-miit 6-imut tamatuma kingunerisaanik tassaalissapput imm. 5-miit 7-imut.

§ 2-mut

Imm. 1-imut

Inatsisissatut siunnersuutip ullormi 1. juli 2017-imi atortuulernissaa siunnersuutaavoq.

Imm. 2-mut

Siunnersuutaavorli § 1, 1, 3, 4 aamma 7 ukiumut aningaasarsiorfiusumut 2017-imut atuutissasut. Tassani ilaatigut pineqarput ingerlatseqatigiiffiit Kalaallit Nunaanni aqutsisoqartut tamakkiisumik akileraartussaataitaanerannik erseqqissaaneq, pigisanik aalaakkaasunik Kalaallit Nunanniittunik tunisaqarnermi iluanaarutit inatsimmi § 2 naapertorlugu pissarsiarineqarfimminni akileraaruserneqartussaanerannik erseqqissaaneq aamma unioqquitsiniartoqarsinnaanera akiorniarlugu maleruagassaq. Aalajangersakkat taamaaliornikkut kingumoortumik atuuttussanngortinneqarput.

Siunertaavoq akileraartartut, akileraartarnermi inatsisit il.il. maanna atuuttut qanoq paasineqarsinnaanerisa nalornissutaanerat iluatsillugu akileraanngitsoorniaratarsinnaanerisa akileraarutitigulluunniit siunertaanngitsumik iluaquteqarniaratarsinnaanerisa minnerpaatinniarnissaat.

Imm. 3-mut

§ 16 a-mi, aktiaatillit taarsigassarsiaannut tunngatillugu siunnersuutaavoq aalajangersagaq aktiaatillit unioqquitsillutik taarsigassarsiaannut ulloq 1. februaari 2017 aallarnerfigalugu taarsigassarsiaritinneqartunut atuutissasoq. Taamaasilluni aalajangersagaq imamigut kingumoortumik atortuulersinneqassaaq.

Siunertaavoq aktianik amerlanernik peqartut il.il. akileraarusiisarnerup sakkortusineqarnera atortuulersinneqartinnagu aktiaatilittut unioqquitsilluni taarsigassarsinissaannik, taamaalillutillu taarsigassarsiaminnik akileraarnikinnerunikkut atornerluinissaraluannik pinngitsoortitsinissaq.

Imm. 4-mut

Siunnersuutigineqarpoq, siunnersuut § 76, imm. 4, sulisussanik atukkiussinermi unerartitsisussaataitaaneq ulloq 1. januaari 2018 aallarnerfigalugu atuutilersinneqassasoq.

Tamatumani siunertarineqarluni kalaallit suliffeqarfutaat il.il. unerartitsisussaataitaasut, suliffeqarfimmik nunanit allameersumik sulisussanik attartornissamik isumaqatigiissuteqarfigneqartunut paasissutissanik pisariaqartinneqartunik, unerartitsinermut,

nalunaarutiginninnermut aamma akileraarutininik A-nik akiliuteqarnissamut atugassanik,
pissarsiniarnissamut naammattumik piffissaqarnissaat qulakkeerumallugu.